

WANTOK



OCEAN BLUE

Tuna in oil
Rait teist
yah!

Wan Wik, Oktoba 6 - 12, 2005 NAMBA 1629 Niuspepa bilong yumi ol PNG stret! K1.00 long Mosbi tasol - Ausait Mosbi K1.30

KUMBA KOR TOK

KLIA

"Dispela i mas klia. Long sait bilong lo i bosim ol dispela mani. Apim bilong mak bilong mani mi laik kamapim i apim mak bilong non diskreseneri mani we i no stap long laik bilong memba. Mi laik apim mak bilong developmen mani bai ol bus ilektoret olsem Nuku i ken kisim gutpela kaikai long en."



PES 3:
Man nating noken werim yunifom bilong Ami



PES 8:
Siti kamapim balm olgeta Shop N Shop



PES 16 na 17:
Baini wantaim pikinini bilong Mista Kwin



DELTA

POWERED BY TOYOTA DIESEL ENGINE

Proven in PNG



Ela Motors TRUCKS

TOYOTA TSUSHO (PNG) LTD.

FOR MORE INFORMATION CONTACT
Jim Maxwell - Ph 3229400
Email : jmaxwell@elamotors.com.pg

WIDE CAB LWB 3 TONNE CARGO TRUCK

Special Offer

K69,990*

DRIVE AWAY!

Offer Expires : 31/10/2005.

*Conditions Apply

WE PROVIDE ✓ TOTAL SALES ✓ GENUINE PARTS & SERVICE BACKUP ✓ FINANCE ✓ LEASE PACKAGES ✓ THROUGHOUT 15 BRANCHES NATIONWIDE

Bikman amamas long Logohu awot

Veronica Hatutasi i raitim

OL MEMBA bilong bipo komiti i bin kamapim Mama Lo bilong PNG i amamas long luksave long Logohu Awot sistem na tupela long ol wanlain bilong ol i bin kisim dispela.

Tasol strongpela toktok i go aut olsem dispela luksave we yumi yet long PNG i kamapim bihain long 30 krismas bilong indipendens em ol i noken givim i go long ol korap lida na ol lain i laik brukim yuniti bilong kantri.

Wanpela long ol 11-pela memba bilong Konstitusenel Plening Komiti (CPC), bipo memba bilong Tari/Pori na nau wanpela komyuniti we ol pipel i gat bikpela luksave long em, Sir Mathiabe Yuwi i tok.

Em i tok tu olsem em i no amamas tumas bikos CPC grup i bin mekim bikpela hatwok long yuniti bilong kantri antap long Mama lo ol bin kamapim long en i no bin kisim gutpela luksave. Las wik Wantok Niuspepa i bin putim kamap wanpela stori long bel hevi bilong Sir Matiabe na John Kaupa, husat i stap insait long CPC Komiti long wankain samting. "Mipela i bin wok hat tru, de na nait



LOGOHU LUKSAVE: Prinses Anne bilong Royal Famili i bin givim ol namba wan oda bilong Logohu o Kumul i go long ol bikmanmeri namba wan taim las wik.

wantaim nogat gutpela malolo na taim long stap wantaim famili, long strongim yuniti bilong kantri na kamapim Mama Lo i makim olgeta pipel insait long kantri bilong yumi.

Tru, long ol selebresen bilong 30 yias aniveseri, ol bin kisim mipela ol CPC Komiti memba wantaim ol meri bilong mipela long kam stap long hotel. Tasol em i moa beta long givim luksave long ol. Mi sapotim na namba tu bilong em, John Momis. Wankain tu long Gavana Jenerel Sir Paulias Matane, em gutpela man mi amamas long em i kisim Logohu Awot yet i gat mining bilong yumi ol PNG stret. Na ol i mas givim awot i go long pipel i save hatwok, ol i save wokim ol trupela toktok na i no giaman na i gat stretpela pasin," Sir Matiabe i tok.

Long wankain taim tu, Sir Matiabe i bin tok amamas long Prinses Anne em pikinini meri bilong Kwin Elizabeth long givim namba wan Logohu Awot sistem bilong PNG stret i go long ol lain i gat namba.

Long wankain taim tu, Sir Matiabe i tok ol lida bilong tude i mas soim gutpela pasin na ol yangpela i kam bihain bai bihainim tu.

Na husat lida i wokim rong long stil na brukim lidasip lo i mas kisim mekim save aninit long lo. Sir Matiabe i no sapotim tupela Bil long lidasip na apim mani ol Palamen memba i save kisim olsem ilektorel Developmen Fan.

Morobe pipel bai baim blok fi long Koiari papa graun

Paulus Tali i raitim

OL MOROBE manmeri husat i save stap long Morobe blok ausait long Pot Mosbi siti nau bai i mas baim blok fi i go long ol papagraun bilong Koiari.

Dispela tok orait i kamap long wanpela bung bilong ol pipel i stap long Morobe Blok long 9 Mail ausait long Pot Mosbi.

Dispela bung i kamap bihain long sampela pipel i stap long Morobe Blok i no baim blok fi bilong ol inap long tupela yia.

Siaman bilong Morobe Gorowa Jujuc Asosiesen Zibe Nero i tok orait bilong ol i baim fi i bin stap pinis bipo yet tasol bikos long asua bilong sampela bilong ol i no baim yet fi bilong ol Zibe i tok dispela i ken kamapim hevi namel long ol na ol Koiari papa graun.

"Sapos yumi bihanim gut dispela tok orait bai nogat dispela kain hevi i kamap," Zibe i tok. "I mas i gat pasin bilong harim tok na rispek i stap long komyuniti bilong yumi."

Long taim bilong bung Gordons Polis Stesin Inspekta John Mark husat i kamap long dispela bung tu i tok ol Morobe i gutpela lain na olsem i nogat planti hevi bilong lo i kamap long



HARIM TOK: Zibe Nero, siaman bilong Morobe Gorowa Jujuc Asosiesen i toksave long ol manmeri long 9 Mail Morobe Blok long ol i mas baimblok fi bilong ol long olgeta yia.

komyuniti bilong ol. "Mi askim ol lidaman long dispela hap long wok klostu wantaim mi na yumi inap kamapim gutpela sidaun," Inspekta Mark i tok.

Long strongim toktok bilong Inspekta Mark Dairekta bilong Komyuniti Polising Progrm Sief Inspekta Daniel Linnonge i tokim ol lidaman olsem ol i mas toktok gut long ol pipel long komyuniti bilong ol long ol i no ken mekim kain kain pasin

nogut. "Yu husat pikinini Morobe yu mekim kain kain trabel ol lida na mi bai mekimsave long yu mi amamas long kain bung i kamap na olsem dispela i ken stretim hevi bilong komyuniti," Sief Inspekta Linnonge i tok.

Em i salensim ol pipel bilong Morobe olsem i mas bihainim ol gutpela pasin Kristen na olsem ol i mas stap gut wantaim narapela narapela wantaim pasin rispek o soim ona.

Wes Nu Briten amamas long ol nupela ilektoret

OL PIPEL bilong Wes Nu Briten provins i redi long tok oraitim laik bilong ol long tupela moa ilektoret bilong provins bilong ol taim ilektorel Komisn i bungim ol neks wik.

I gat tupela nupela ilektoret ol i laikim, na dispela tupela em Glosa-Bali Vitu na Nakanai-Hoskins.

Nau yet, ol dispela ilektoret i sanap olsem: Kandrian-Glosa Open wantaim 57,700 na Talasea Open wantaim 138,700.

Presiden bilong Kaliai-Kove lokol level gavman Joel Kalus i tokaut long dispela taim em i

givim tok wanbel long Gavana Clement Nakmai olsem ol pipel bilong em i sapotim strong kamapim bilong dispela tupela nupela ilektoret.

"Sapot bilong ol pipel bilong mipela i sanap strong yet long provins i mas kisim tupela nupela ilektoret we Is Nu Briten, Nu Ailan na Not Solomons bai i gat wan wan nupela tasol," Mista Kalus i tok.

Ol arapela pipel husat i bin stap long opim bilong Bagai Et Pos i givim bikpela sapot bilong ol tupela nupela ilektoret bilong provins.

Nakmai givim luksave

GAVANA bilong Wes Nu Briten Clement Nakmai i givim luksave long ol nesanel lida bilong tude na bipo long luksave bilong ol long strongim na sapim kantri long kisim indipendens.

Mista Nakmai i bin givim luksave long praim minista tude, Grand Sief Sir Michael Somare, bipo deputi bilong em Sir John Guise, Sir Paul Lapun na ol arapela biknem lida husat i bin wok strong pastaim na bihain long kantri i kisim indipendens."Ol dispela lida husat i bin gat dri-

man bilong Papua Niugini na bihain taim bilong em, long lusim lukaut bilong ol mama kantri," Mista Nakmai i tok. "Maski mipela kisim indipendens, ol pipel bilong Bagai, Kavako, Otogoigoi, Digina, Ravos na Lamogai i mas stretim ol yet long kirapim moa wok ikonmik na sosel developmen.

Wanpela presiden bilong Kaliai Kove lokol level gavman i tok dispela em i bin namba wan taim bilong wanpela gavana bilong provins i go raun lukim ples.



Kumbakor tok klia

...hevi bilong pipel long bus ples i as bilong bil

Neville Choi i raitim

HEVI bilong ol pipel insait long Nuku distrik i stap long as bilong bil we Mema bilong Nuku i laik kamapim bilong apim mak bilong mani i go long ol memba bilong Palamen.

Mista Kumbakor i bin tokaut long as tingting bilong em long kamapim dispela bil we em i laikim bai Palamen i mas senisim mak bilong mani insait long baset we ol memba i save kisim bilong kirapim wok developmen insait long ol ilektoret bilong ol.

"Dispela bil i laik senisim seksen 95 (A) na seksen 95 (B) bilong Ogenik Lo i bosim ol Provinsel na Loko Level gavman we i bosim ol distrik na provinsel sapot grant. Nau yet em i K500,000 we 50% em i diskreseneri mani we planti manmeri nau i tok em i wanpela stas fan. Narapela 50% i go bek long ol wok developmen aninit long lukaut bilong Baset Praioriti Komiti," Mista Kumbakor i tok.

Em i tok mani em i laik apim mak bilong em i no mani we ol memba i ken yusim long laik bilong ol. Hap we em i laik apim em mani we gavman i makim bilong kirapim ol bikpela wok developmen.

"Dispela i mas klia. Long sait bilong lo i bosim ol dispela mani. Apim bilong mak bilong mani mi laik kamapim i apim mak bilong non diskreseneri mani we i no stap long laik bilong memba. Mi laik apim



SAPOT I STAP: Gavana bilong Westen Provins em i wanpela memba bilong Palamen husat i autim sapot bilong em long agensim tupela bil.

mak bilong developmen mani bai ol bus ilektoret olsem Nuku i ken kisim gutpela kaikai long en.

"Planti i autim ol nogut sait, mi laik givim tingting bilong mi. Wanem memba, namba wan bikpela wok bilong en em long mekim lo long flua bilong Palamen. Bilong wokim lo. Mi kam long Palamen long mekim lo. Tasol bihain long en, bai mi go bek long wanem hap? Mi bai go bek long ples. Taim mi go bek, mi memba bilong distrik, na mi mas karim hevi bilong distrik bilong mi. Mi

ken tok olsem olgeta krismas i kam inap nau, ol distrik olsem Nuku i gat 5-pela bikpela hevi."

Mista Kumbakor i tok long Nuku yet, namba wan bikpela hevi em i karim em gavman i no givim luksave long em olsem wanpela taun o distrik. Nogat. Em i stap yet olsem wanpela sab distrik.

"Ating planti manmeri i wok long bagarapim dispela bil i mas ting olsem olgeta manmeri long kantri i gat 24 aua pawa, wara saplai na gutpela haus, pos opis na beng. Ating

ol i mas ting olsem. Dispela i no tru insait long ol ilektoret olsem Nuku.

Ol arapela bikpela hevi Mista Kumbakor i makim em ol helt na edukesen sevis i no strong insait long ol bus ples.

"Mi mas lukim baset i makim mani i go daun long distrik stret. Helt na edukesen i bagarap tru. Trensport em i bikpela hevi tru long ol bus ples tude. Long ilektoret bilong mi yet, mi gat moa long 73 kilomita nesenel rot. Mi gat moa long 600 kilomita yet we mi mas opim. Na long kamapim rot wantaim K500,000 em bai hat tru. Long las gavman, rot namel long Nuku na Aitape, mani mak bilong em i K5 milien long mekim wanpela pailot rot. Long mekim narapela nupela rot tude, em bai i mas K5 milien gen. Bai mi kisim long we?"

"Nau mi lukluk long mani i mas stap bilong ol wan wan ilektoret aninit long Mama Lo. Nau yet mipela i gat nesenel baset, mipela i gat provinsel baset, tasol i nogat distrik baset. Ol gutpela provinsel gavman i save helpim distrik bilong ol. I nogat wanpela halivim i save kam long nesenel gavman. Wanpela hap mani tasol bilong go long ol distrik em dispela K500,000. Mi save lukim dispela mani tasol. Olsem na dispela bil em i gutpela bilong ol bus ilektoret olsem Nuku. Ating i no gutpela bilong ol arapela ilektoret," em i tok.



WANPELA stori dispela wik i sut long stail bilong tumbuna pasin tude we i no strong moa olsem taim bipo. Yu ting wanem? Em i tru o nogat?

PIKININI bilong Misis Kwin, Prinses Anne i kam na i go pinis. Planti manmeri insait long Mosbi sifi husat i bin tuhat wantaim na go lukim em long ples balus i bin amamas long wanem ol i tok. Em i wanpela gutpela sans bilong lukim wanpela long ol Royal Famili i kam raun long kantri bilong yumi.

TASOL olsem wanem long ol arapela manmeri i stap ausait long Mosbi. Planti nau i wok long les long Mosbi i save kisim olgeta bikpela samting na ol provins i save abrus.

WANPELA samting Mosbi i save bungim hevi long en em pasin bilong stil long taim i go klostu long krismas na niu yia. Long dispela kain taim, ol stilman i save raun long nait na kalapim ol banis nabaut. Ating ol provins i orait long dispela kain pasin. Tru o nogat?

MAN, ol manmeri insait long Mosbi i klostu indai taim ol i harim olsem SP Bruri o haus bia i bin sotim mak bilong ol bia bilong em. Ol strongpela biaman i bin stap wantaim bikpela wari tru. Tru tumas, olsem wanpela wanfamili bilong ol i lusim ol na ol i wari tru ya.

Tokwin i harim olsem krismas spesol bru o bia bai kam aut klostu. Tasol long self bilong ol lika sop yet i pulap long Independens bru bilong las mun. Sore, dispela kain em taim yu dabol long tupela spesol bia yu hitim stret Niu yia, yah... Tok pilai tasol!

Man nating noken werim yunifom bilong ami

BIKPELA tok lukaut i go aut long pablik long nokem werim ol yunifom bilong Papua Niugini Difens Fos long wanem em i agensim lo.

Piksa bilong Kumul na kala bilong difens fos yunifom olsem ol snot, trausis, ol kep em ol kain kain manmeri nating i save werim.

Difens Fos Sief ov Staf, Nevi Kepten Alois Ur Tom i tok Difens Fos em i wanpela institusen em mama lo bilong kantri i kamap olsem na Difens Fos yunifom em i olsem pes bilong PNG Difens Fos. Long dispela as na ol manmeri nating i no inap werim.

Kepten Tom i tok husat manmeri nating i werim yunifom bilong Difens Fos na raun nabaut long rot em ol soldia bilong PNGDF bai askim em long rausim na givim bek.

Long narapela nius bilong Difens Fos, olgeta bokis i holim katres we mak bilong em i winim 9000 rauns we i bin lus long katres haus bilong Difens em ol i painim pinis.

Faipela yut bilong Lolak ples long Manus em ol i holim ol long brukim na stilim ol dispela samting.

Minista bilong Difens, Mathew Gubag i tok olsem olgeta katres bilong ol i bin lus, em ol i kisim bek pinis.

Em i autim tingting bilong em tu long les pasin bilong ol soldia husat i save lukautim haus katres na em i laikim wanpela wok painimaut long sekim na bai ol i rausim ol.

Ol stilman i bin kalapim fran get na antap long rup. Ol i yusim bol kata long opim rup na go insait long ples we ol katres i stap.

Amamas long PNGDF

OL PIPEL bilong Isten Hailans i bin soim bikpela welkam tru taim balus bilong PNG Difens Fos Arava wantaim pailot na kru i pundaun long Goroka ples-balus las wik Fonde.

Dispela raun bilong ol i go long Goroka em long statim operesen bilong Grin Revolusen long Hailans rijen bihain long ol i pinisim raun bilong ol long Sauten rijen pinis.

Wanpela singsing grup bilong ol asples bilong Goroka em ol lain Faniufa wantaim sampela lain Marawaka i bin wetim ol long ples balus na givim samsam stret long pasin bilong tok welkam long Hailans.

Dispela Arava balus bilong PNG Difens Fos bai statim wok bilong en long flai i go insait long ol bus ples insait long Hailans rijen na karim ol kopi i go aut long maket. Dispela ol kopi i stap long ples we i nogat rot long kar na turangu ol fama long dispela hap i save kisim hat taim tru long salim kopi bilong ol.

Wanpela pailot bilong dispela Arava balus, Kepten Albert Tagua i tokaut olsem em i guria stret long kain pasin ol lain i soim long Hailans taim balus i bin go pundaun long Goroka.



JUST ARRIVED - PRESENTATION A4 QUALITY COPY PAPER

data-max
Premium Quality White
A4 Copy Paper 80GSM

PRODUCT CODE : 4780

1-99 reams
K13.97
PER REAM

100+ reams
K12.10
PER REAM


All Prices are Inclusive of GST



Waligani Drive, Port Moresby

Tel: 325 6500

Fax: 325 0302



Kala bilong pasin tumbuna i no moa olsem bipo

Sape Metta i raitim

KALA bilong kalsa na tredisen, o bai yumi ken tok, pasin tumbuna bilong yumi ol lain PNG i no moa stap strong olsem bipo.

Na dispela em i wanpela

bikpela wari we ol lida man na meri long ol ples na hauslain i autim na tokim *Wantok Niuspepa* bihain long Goroka So we i bin kamap long Independens wiken. Amos Kene husat em viles komyuniti lidaman long

Kuru viles long Henganofi distrik, Isten Hailans i mekim dispela tok wari bihain long emi lidim grup bilong em, em Kuru-Kumul singsing grup we ol i bin stap insait long Goroka So tupela wik i go pinis.

Mista Kene i tok tru kala bilong pasin tumbuna i go hait isi isi na i no long taim kalsa bilong waitman bai tekova.

Em i tok olsem lidaman long ples em i bin lidim ol singsing grup long viles bilong em i go long stap insait long Goroka So, na em i mekim olsem long olgeta yia inap moa long tempela krismas olgeta.

"Namel long dispela ol yia mi lukiuk na skelim olsem pasin kalsa na tredisen bilong yumi em i no moa stap olsem bipo. Yumi i pas na yusim tumas ol pasin kalsa bilong ol waitman, long dispela as yumi i wok long miksim pasin tumbuna bilong yumi na kalsa bilong ol waitman. Olsem na tru kala bilong pasin tumbuna bilong yumi i no moa stap olsem bipo," Mista Kene i tok.

Em i tok, long taim bilong so, em i taim bilong putim aut ol kala tru tru bilong pasin tumbuna.

Tasol pasin tumbuna i wok long miks wantaim pasin kalsa bilong ol waitman.

Olsem na long taim bilong sings-

ing, ol meri i wok long werim ol pens na bra long pasim susu na ol man i putim sanglas, hanwas, su na werim andapens.

"Em wanem, pasin tumbuna o?" Mista Kene i askim. Em i tok, sapos PNG i laik lukautim pasin tumbuna bilong en, em i mas ekt nau long kamapim ol trening insait long ol skul we ol skul pikinini i ken lainim na kisim skul long kipim pasin tumbuna i go het.

"Dispela em i ams kamap olsem wanpela program long skul, long wanem, sapos yumi i no inap long mekim olsem, tru tumas, kalsa bilong ol waitman bai kamap strong na teko-va long ol pasin tumbuna bilong yumi," Mista Kene i tok.

Na dispela hap tok em i tru, long wanem long ol skul, planti ol pikinini i wok long lainim na pas strong tru long kalsa bilong ol waitman. Na ol i lusim tingting long pasin tumbuna bilong ol yet stret.

Nogut long bihain taim ol tumbuna bilong yumi bai i no inap save pasin tumbuna em wanem.

U-Vistrak nogat mani

KWIK mani skim U-Vistrak we i gat dinau long planti tausen pipel long olgeta hap bilong PNG i poket bruk na i nogat mani, ol ripot i tok.

Ol ripot i tokim ol pipel husat i putim mani long U-Vistrak bilong noken gat bikpela hop olsem mani i stap.

Tupela man i bin wok wantaim Noah Musingku em papa bilong U-Vistrak long Tonu ples we beng, ol opis na haus slip bilong King Noah i stap long tupela stori bilding.

Tupela man husat i no tokaut long nem bilong ol i tokaut olsem U-Vistrak i nogat mani.

Mista Musingku i bin promis ol long peim ol K38,000 insait long wanpela potnait tasol ol i kisim tasol K250 insait long tripela mun.

Ol ripot i tok tupela man i tokaut olsem bikpela samting em preia long olgeta de, bihainim gutpela pasin na nogat dring bilong ol, nogat smuk na bihainim tok bilong Bikpela.

Tari komyuniti sanapim bikpela haus

Timon Henry i raitim

WANPELA bikpela bung i bin kamap long ples Tigiri insait long Mendi, Sauten Hailans provins.

Dispela bung we i kamap, em ol i bin sanapim wanpela haus long en, olsem na ol i singautim mausman bilong Mendi Katolik Daiosis, Bisop Stephen Reichert long bung wantaim ol long dispela bikpela de bilong ol.

Ol yut bilong tigiri Katolik komyuniti i bin tok welkam long Bisop Stephen Reichert wantaim ol sampela lei wokman bilong em insait long Mendi daiosis long bung wantaim ol na lukim dispela bung bilong ol long Tari.

Insait long dispela komyuniti tu i gat 5000 manmeri we i i tok gavman i no save givim han long ol long ol kain liklik developmen insait long komyuniti.

Olsem na ol yet i bin kirap na kamapim dispela asosiesen long bikpela hat wok bilong ol.

Tresera bilong dispela asosiesen, Pater Robert Gigmai husat i save lukautim mani bilong ol i tok, "Yumi yet mas sanap long lek bilong yumi na mekim wok. Olsem na long homili bilong em, em i tok pinis olsem yumi yet i sios long go pas long ol kain liklik developmen insait long komyuniti bilong yumi.

Olsem na Bisop Stephen i tok strong moa long Tigiri Katolik manmeri olsem ol i gat pawa long wok bung wantaim sapos laik pasin i stap long ples bai liklik wqok bilong ol i ken kamap strong bai i no inap pundaun nabaut.

Em i tokim ol long lukautim ol gut. Em i tok tu long lukautim gut ol sevis olsem skul heit sab-senta na em i tokim ol yangpela long noken smukim spak brus.

Wantok Niuspepa i kisim ripot olsem insait long dispela provins i gat bikpela hevi long sait bilong provinset gavman, we i nogat plen na baset bilong developim dispela risos provins.



TUMBUNA STAIL STRET: Kuru-Kumul singsing grup lidaman Amos Kene wantaim tupela pikinini meri bilong en i bilas long pasin tumbuna na i kirapim das long Goroka So long independens wiken.

Mendi Katolik Daiosis skulim ol turangu

Timon Henry i raitim

MENDI Katolik Daiosis i kirapim wanpela spesol program bilong skulim ol manmeri na ol pikinini husat i maus pas na yia pas na tu bilong lanim ol long wakabaut gut. Dispela trening i kamap long Kallen Sevises bilong Mendi na kam long Maunt Sion Senta long Goroka long serim save wantaim ol arapela.

Dispela em i namba wan kain samting long dispela reijen na ol i tok olsem em i moa gutpela

long givim moa trening i go long ol arapela Risos senta insait long Papua Niugini.

Ol i tok moa olsem dispela kain trening i kam long ol arapela senta. Dispela em i wanpela we bai mipela ken helpim ol arapela, na stretim wanem kain wok ol i mekim na promotim gutpela skul bilong ol, maski long wetim gavman long helpim yumi na tu givim long ol bai ol i ken kirapim wanem kain program bilong dispela senta. Program

Kodineta bilong Kallen Spesol Edukesen Risos Senta, Mendi, Noreen

Willam i amamas na tok tenkyu long ol wokman i kam long Maun Sion Spesol EdukesenRisos Senta long Goroka em Mis Bagore, Mista Joseph na Mista Kawage (ai pas) tasol em i wanpela bilong dispela husat i kam long go pas long dispela insevis trening.

Training i bin stat long namba 4 de bilong mun Septemba na i ron i go long namba 9 de. Program Kodineta Noreen Willam i tok



METALS REFINING OPERATIONS LTD

PUBLIC NOTICE

FRAUDULENT CHEQUES

SERIAL No: 030600 - 030800
(ANZ Cheque Book Waigani Branch)

Please be advised that Metals Refining Operations Limited will not honour any cheque payment within the Serial Number range 030600 - 030800.

Please note that some con man has a copy of the cheque book with the above serial number and a alluvile purchase receipt book which he is using to issue as receipts for selling gold to Metals Refining Operations Limited.

The con man is forging signatures and cashing cheques at various shops.

Please contact Metals Refining Operations Limited immediately if in doubt on telephone: 3252647.

Bogenvil sapotim Turisim long rijen



ROTBLOK: WANPELA long ol rotblok long Buin i tok ol i stopim ol hombru na strongpela dring wantaim spakbrus i go long Saut Bogenvil. Wanpela long ol tu i bin rausim ol turis bilong Japan wantaim K8, 000 askim long ol.

OTONOMES
Bogenvil Gavman
ABG) i tok oraitim ol
rot we Turisim bisnis i
ken kamap bikpela
insait long rijen.

Presiden bilong ABG Joseph Kabui i tok sampela long ol samting we Bogenvil Eksekutiv Kaunsel i tok orait long ol pinis i karamapim:

- Trensferim wok bilong bilong Turisim na Klasa i go long Komes Dipatmen

- Tok oraitim na kamapim Bogenvil Turisim Asosiesen na ol memba bilong em

- Givim wok bilong Turisim Bot i go long Turisim Asosiesen

- Givim sapot mani long mak bilong K100,000 i go long Interim Bogenvil Turisim Asosiesen long baset bilong dispela yia na long ol baset bilong bihain taim na

- Kisim ol Turisim Developmen opisa bilong karimaut ol wok long Otonomes Bogenvil Rijen.

Long wankain taim tu, ol bin rausim planti turis bilong Japan i bin laik go long Buin insait long Saut Bogenvil na lukim ol ples we ol soldia bilong ol i bin pait na dai long em long

bikpela pait em Wol Woa 2, klostu 60 kris-mas i go pinis.

Ol ripot i tok 30pela turis bilong Japan olgeta i bin raun i go long Bogenvil bilong raunim ailan na lukim ol matmat we ol i planim ol soldia bilong ol, lukim Yamamoto balus ol ami bilong Amerika i bin sutim long Buin na kilim dai bikpela komanda na bos bilong ol ami bilong Japan i pait long Pasifik rijen.

Ol bin laik kisim sampela bun bilong ol dai soldia i stap long Bogenvil yet i go bek long Japan.

Ol ripot i tok 16-pela turis i wok long go long Buin taim ol i stopim ol long rotblok na askim ol long peim K8000 bipo em i orait long ol i go, tasol taim ol i no wokim peimen, ol i salim ol i go bek long Buka.

Ol no bin amamas bikos ol bin kam long longwe ples stret long lukim Yamamoto balus na ol arapela samting i karamapim namba tu bikpela pait long wol.

Plantilain i no amamas long kain pasin em grup ol i kolim Mekamui i mekim long pasim rot long laik bilong ol. Ol atoriti long Bogenvil i tok ol bai mekim olgeta samting long pasim.


Dion bai sapotim K1.5 milien Bil

Aloysius Laukai i raitim

IS Nu Briten Gavana Leo Dion bai sapotim wanpela long tupela Bil gavman i laik glasim na skelim insait long bung bilong em long dispela mun.

Mista Dion i tokaut long dispela insait long toktok bilong em long ol selebresen bilong 100 yias Katolik Sios i bin kamap long Duk ov Yok Ailan grup insait long is Nu Briten provins las Sande.

Bil we Mista Dion bai sapotim em apim lektorel Developmen Fan (EDF) bilong ol memba long K500,000 mak em i stap long em nau i go antap long K1.5 milien. Mista Dion i tok em bai ino inap sapotim lo we ol




SAPOTIM BILL: Gavana bilong Is Nu Britan Leo Dion

bai i no rausim ol palamen lida husat i wokim rong na brukim Lidasip Lo.

Em i tok ol EDF mani i bilong karimaut ol wok long kamapim developmen long ol distrik na ol i mas sapotim.

Long bekim askim long ol memba i save paulim mani, Mista Dion i tok i gat ol gaidlain o lo we i lukautim ol dispela mani na husat memba ol i painim olsem em i paulim na stilim mani, lo bai stretim.

Mista Dion i tok planti Palamen memba i wok long yusim gut ol EDF mani long kamapim ol wok developmen long ol ilektoret bilong ol na liklik lain husat i gat ol kain tingting i no ken paulim ol. Wantaim dispela ol memba i ken mekim gut wok.



2005 PNG Okupesenenel Helt na Sefti Enuel Konfrens (namba 13) na Tred Fe

Namba 20 de bilong mun Oktoba 2005
Holiday Inn Pot Mosbi

Het Tok: "Okupesenenel Sefti, Helt na Envairomen em Bisnis bilong Olgeta."
Dispela konfrens bai lukluk long ol gutpela wok menesmen long helt, sefti na envairomen (HS&E) sistem insait long ples bilong wok

Konfrens Program 20/10/05

Tok Welkam Opening - Praim Minista o mausman bilong em
SESEN WAN - gutpela menesmen bilong ol sefti sistem insait long wok ples
Pepa - Sekretri bilong Dipatmen bilong Leba o wok - OHAS lukautim ol wokmanmeri Ol mausman bilong industri
SESEN TU - gutpela menesmen bilong ol helt sistem insait long wok ples Pepa - Helt Dipatmen Ol mausman bilong industri
SESEN TRI - gutpela menesmen bilong ol envairomen sistem insait long wok ples Pepa - ol Nupela Envairomen Ekt na regulesen - Sekretri bilong Dipatmen bilong Envairomen na Konsavesen Ol mausman bilong industri
SESEN FO - gutpela menesmen bilong helt, sefti na envairomen (HS&E) sistem insait long wok ples Pepa - Insurens Kaunsil bilong PNG Ol mausman bilong Maining, trenspot, rurel industris
OL TOKTOK BILONG PINISIM Minista bilong Leba Ol posta pepa - ol liklik ailan pepa
ENUEL JENEREL MITING SEFTI PNG
KOKTEL PATI

Ples Deleget bal slp long en (go stret long hotel)

Gateway	K292.60/wanpela nait jkramer@coralseahotel.com.pg
Shady Rest	K181.50/193.60/wanpela nait reservations@shadyrest.com.pg

Stori bilong Nominesen
Mi/Mipela laik kamap long SEFTI PNG Namba 13 Enuel Konfrens we bai i kamap long namba 20 de bilong mun Oktoba 2005

Namba bilong ples bilong konfrens

Ol Nem.....

Ol Posisen.....

Kampani.....

Pos Opis Bokis Namba.....

Email adres.....

Telepon.....Feks.....

Bai yu baim olsem wanem
Sallm dispela fom na pelmen i go stret long SEFTI - PNG - 2005 Conference
PO Box 286
Port Moresby
Fax 3210630
Email sefti_admin@global.net.pg
Konfrens Kodneta - Dick McCarthy
McCarthy & Associates (forestry) Pty Ltd
Ph/fax 3210134 rbmcc@datec.net.pg


PE BILONG KONFRENS
K70.00 bilong ol SEFTI-PNG memba
K90 bilong ol non memba

Ol bikpela Sponsa
UMW
Ok Tedi
PNG Forest Industries Assoc
RH Group of Companies

Ol Tred Fe Eksibita
ABC Signs
Chamber of Mines & Petroleum
National School Nursery project
Origin Energy; SEFTI PNG

Ol Sponsa
Oil Search
Coca Cola Amatil (PNG) Ltd
Ol poro bilong Sefti Orica

Polis paitim skul manki wantaim busnaip



POLIS KAMAPIM: Manki wantaim het i sua we ol polis i paitim na katim.

Iona Reto na Josephine Mann-DWU - i raitim

OL manmeri i mas ripotim hariap sapos ol polis man i kamapim birua o wokim samting i no stret long ol.

Provinsel Polis Komanda bilong Madang Nema Mondia i wokim dispela toktok bihain long harim ripot bilong 4-pela polisman long Madang i paitim nogut tupela skul manki na kamapim bagarap long bodi bilong ol.

Ol ripot i tok wanpela polis rapit rispons yunit (RRU) opisa na Koreksenal Sevis opisa i bin paitim

nogut 4-pela skul sumatin namel long 13 na 216 krismas long Madang taun na kamapim bagarap long ol.

Mista Mondia i no bin kisim yet ripot long dispela samting tasol taim em i harim ol ripot long dispela, em i egensim dispela pasin.

Na em i tok em i egensim lo long ol polis manmeri i wokim dispela pasin na tok ol lain i kisim bagarap i mas putim ripot hariap i go long polis o i go stret lukim em.

Ol manki i kisim bagarap i luksave long tupela opisa husat i kamapim birua.

Kalsereel so bai gutpela moa

Yowakicte Buafec i raitim

PLANTI manmeri long Lae siti na ol bikpela kampani insait long Lae siti na Morobe provins i wok redi nau long salim ol samting insait long tupela de Kalsereel So.

Na planti kampani insait long Lae siti i stat pinis long muvim ol diwai na lip long bus long wokim ol liklik haus bilong putim ol kaikai na ol arapela samting moa long salim long Morobe kalsereel so.

So bai bai kamap long Oktoba 16 na 17.

Ol kampani bai salim ol samting ol i kamapim. Sampela ol stoa haus em ol i sanapim pinis insait long so graun.

Em ol lain olsem Leanne's Beik Stoa, Lae Biskit kampani, Anots Biskit, Ramu Suga, tri Roses, Niugini Teboibets na sampela ol kampani wantaim ol liklik bisnis manmeri i stat pinis long wokim ol haus na stol

bilong ol long wik i go pinis.

Ripot i tok i luk olsem dispela Morobe Provinsel kalsereel So bai pulim planti arapela bikpela samting we i no bin kamap bipo long sampela krismas bipo tasol bai kamap nau.

Siaman bilong so Mike Quine i tok dispela so bai pulim ol turis long ovasis na ausait long provins long go stap wantaim ol poroman na wantok.

Em ol lain i stap long ol ples olsem Mosbi, Ok Tedi, Mendi, Hagen, Kundiawa, Goroka, Kainantu, Madang, Wewak, Popondeta, Kimbe, Rabaul, Manus na Buka bai i go long dispela kalsereel so na amamas long lukim ol nupela samting i kamap.

So bai bringim planti samting olsem laip ben konset, singsing tum-buna nambis na Hailans, hos resis, parasut resis na moa.

Polis, sekyuriti na manmeri bai was tu insait na ausait long so.

16-pela Beon kalabus i ronawe



ASISTEN POLIS KOMISINA OPERES-SEN- GARRY BAKI: Planti taim polis i save wokhat long holim ol trabel man tasol ol i save ronawe long kalabus.

Michael Novingu i raitim

BIKPELA lain kalabus man bilong Beon haus kalabus i bin brukim haus

nan ronowe i go aut. As bilong dispela em sampela kalabus manmeri i no bin wanbel long disisen ol atoriti i bin mekim long givim sampela kalabus manmeri long marimari pasin bilong amamasim 30 indipenden aniveseri bilong kantri bilong yumi.

Ol polis long Madang i no amamas long kisim ripot 10-pela awa bihain long samting i kamap. Ol i no save husat kalabus i ronawe na wanem asua em bin mekim na em i kalabus i stap.

Long wankain taim tu, wanpela mausman bilong ol polis long Madang i tok ol i no kisim ripot na ol i no inap long karimaut wok long painim ol.

Bihainim dispela ripot, ol 16-pela kalabus i yusim hekso long katim ol ain ba, sekyuriti waia banis long 5 kilok long Sarere apinun na bikmoning long Sande moning.

"Mipela i no inap long karimaut imejensi operesen bikos ripot bilong ol Koreksenal Sevis opisa i kam leit. Long dispela tsaim, ol kalabus man i ronawe lusim Madang pinis na i go long ol arapela provins," mausman bilong polis i tok.

Ol Finsafen fama bai soim nupela kakaruk kaikai

Yowakicte Buafec i raitim

OL Uruo viles pipel insait long Finsafen Distrik bilong Morobe provins i kamapim wanpela kakaruk projek long kamapim kaikai bilong ol kakaruk long wei bilong yusim ol gaden kaikai.

Ekstensen na Voluntia opisa bilong SSCF na Dipatmen bilong Agrikalsa na Laipstok Raphael Roekopac i go pas long dispela projek insait long ples we Wantok Niuspepa i bin kisim ripot olsem dispela projek em i isi long ol ples lain long mekim bikos i gat ol samting bilong kamapim kaikai bilong kakaruk i stap pinis long gaden olsem soyabin, sogum, tapiok, kokonas, na lantro lip we olgeta i stap pinis

long graun bilong ples long yusim na kamapim kaikai bilong ol kakaruk, Mista Roekopac i tok.

Em i tok nau ol dispela lain Uruo fama bai karim ol dispela nupela prodak bilong ol. Dispela gaden kaikai bilong kakaruk i kam long Morobe Agrikalsa so long Oktoba 16 na 17 bai i soim long ol arapela lain manmeri olsem dispela prodak i save groim gut ol kakaruk i fatpela na hevi i gat bikpela gris moa yu no inap karim long han we ol i save givim ol gaden kaikai tasol.

Ol bai soim long pablik ol dispela kaikai bilong kakaruk na soim ol piksa bilong kakaruk tu insait long Morobe Agrikalsa So long wik i kam.

FOR SALE

COCONUT OIL MINI MILLS

Proven in Papua New Guinea for over 8 years
From 150kgms per hour input

Oil Expeller & Filter presses
With 7.5kw electric motors

Prices from K12,990 + GST

FULL RANGE OF SPARES ARE AVAILABLE

For more information, contact



AGMARK PO Box 1921
Rabaul
Ph: 982 9055 / 982 9058
Fax: 982 9056 / 982 9047
Email:md@agmark.com.pg

The NGIP Group of Companies

Mur Iau!
GURIAS are the Champions

Liklik Joe Goma kisim spesel spun long intanesion teista



Foto: JAMES

SPESEL SPUN: Yanpela Joe Goma wantaim Mista Boot na dispela spesel spun.

James Kila i raitim

WANPELA liklik boi husat i gat 14-krismas i bin amamas tru taim wanpela saveman bilong teistim kopi bilong kantri Amerika i bin kolim nem bilong em na givim em wanpela spesel presen.

Dispela spesel presen em wanpela spun.

Nem bilong dispela liklik boi em JOE GOMA, na em bilong Kerowagi insait long Chimbu provins.

Taim em kisim dispela spun em i bin amamas nogut tru. Em i tok olsem em bai haitem gut tru dispela spun i stap bikos dispela spun i kam stret long wanpela spesel man tru husat i gat biknem long teistim kopi bilong planti kantri insait long wok. Nem bilong dispela intanesion teista em Willem Boot.

Boot em papa bilong Boot Kopi Konsalten na Trening husat i gat opis bilong ol long USA na Amsterdam long Netherlands.

Spun bilong teistim kopi em wanpela spesel samting ol tul tru em ol lain bilong teistim kopi i save yusim. Taim ol i raun na teistim kopi ol i save yusim spun long teistim kopi insait long kap

Liklik Joe i bin kisim presen i kam long

Willem Boot, wanpela intanesion man husat em saveman bilong teistim kopi. Dispela man i save raun long planti ol kantri long wok husat i save kamapim kofi, maketim kopi na baim kopi.

Mista Boot i save raun long planti kantri insait long wol na stap insait long ol bikpela intanesion kopi teisting kompetisen.

"Dispela spun i lusim aspies bilong em na karamapim samting olsem 40,000 mail olgeta i kam long PNG."

"Tasol nau mi laik givim dispela spun i go long wanpela liklik spesel man tru husat i soim bikpela intares tru long taim bilong skul insait long dispela kap resis we i bin kamap," Boot i tok.

Em i tok olsem dispela spun i bin raun wantaim em long aspies tru bilong kopi long Ethiopia long Afrika, ol nait klab insait long kantri Kolombia na tu i bin harim ol naispela musik long kantri Bolivia.

Boot i stori olsem mama i bin karim em long kantri Netherlands o sampela i save kolim Holland. Taim em i liklik boi yet na taim em i stap samting olsem 4-pela kris-mas em i bin teistim kopi.

"Mi bin lain long teistim kopi taim mi liklik-boi tru. Olsem na taim mi lukim Joe i stap long dispela resis long kisim skul long teistim kopi, mi bin amamas tru olsem na mi givim em dispela spun bilong mi. Em i ken yusim dispela spun na strongim em.



BANK OF PAPUA NEW GUINEA

PRESS RELEASE

KINA FACILITY RATE (KFR) FOR OCTOBER 2005

Based on the assessment of key macro-economic indicators over the 9 months to September 2005, the Bank of Papua New Guinea advises the public that the KFR is maintained at 6.0 percent for October 2005.

Benny Popoitai, MBE
Acting Governor





YAMAHA

KEROSENE

Outboard Motor

CLEARANCE OFFER

AVAILABLE FOR IMMEDIATE DELIVERY NATIONWIDE

Offer Expires: 31 / 10 / 2005 or While Stocks Last!

EK40JMHL

- 40hp, 2 Stroke
- Kerosene driven
- Out board Motor
- Low Fuel Consumption
- Parts & Service backup

SPECIAL PRICE

K8,299

Price Includes GST

Ela Motors

Port Moresby.. Ph 3229400 Kokopo... Ph 9829100 Kimbe.. Ph 9835155 Buka.....Ph 9835155 Wewak....Ph 8562255 Tabubil....Ph 5489060
Lae Ph 4781800 Kavieng.. Ph 9842788 Lihir.... Ph 9864099 Vanimo...Ph 9864099 Madang.. Ph 8522188 Alotau.....Ph 6410100

Sentral Komyuniti opisa pinisim kos

....Bai helpim gut famili na sosel hevi

SAMPALA
Komyuniti Dvelopmen opisa (CDO) bilong Sentrel provins i redi long karmaut wok kaunseling long ol asples bihain long ol i pinisim 4-pela woksop las Fraide.

Ilevenpela meri Fil Opisa i redi nau long wok helpim daunim ol hevi insait long ol famili na bagarapim ol meri (seksuel vailens) i kamap insait long ol wan wan distrik long Sentrel provins bihainim wanpela woksop ol bin sindaun long em long Sivarai Namona long Bomana.

Long taim bilong pasim woksop, Siaman bilong Famili na Seksuel Vailens Eksen Komiti (FSVA) Profesa Lawrence Kalinoe i bin tok ol i save yusim pasin bilong paitim na bagarapim man long lukautim sait bilong ol

tasol olgeta man i mas go insait long stopim dispela hevi.

Em i tok dispela pasin i kamap long olgeta hap bilong kantri na pipel i mas senisim pasin.

"Pipel i mas senisim pasin long vailens o pasin bilong paitim na wokim nogut long meri. Na long ol dispela trening na kos, ol senis i ken kamap," Profesa Kalinoe i tok.

Em i tok ol opisa bai i lukim olsem senis i mas kamap.

Em i tok FSVA i han bilong Konsaltativ Monitoring na Implimentesen Kaunsel (CIMC) bai helpim long strongim netwok o wok poroman wantaim Provinse! FSVA komiti we ol bai klostu kirapim. Sosel Welfea na Dvelopmen Menesa bilong Sentrel Provinse! Etministresen Tabu Vaira i bin tok tenkyu long FSVA -CIMC

long fandim dispela woksop.

Em i tok komiti i bin givim K9,000 i go long woksop na tu, em i tok tenkyu long meri i bin go pas long woksop, Onie Teio bilong Siti Misin.

Mista Vaira i tok as tingting long holim dispela trening woksop em long trenim ol opisa long besik kaunseling we i as long wok bilong ol i no go hariap

Em i tok sta. yet long 1999 taim ol opisa i bin stst wok, ol no bin kisim sampela trening long kaunseling na planti ol hevi em ol i save salim i go long Sosel Welfea na Dvelopmen long Konedobu long lukluk long en.

Mista Vaira i tok nau ol opisa bin wokim kos, bai ol i no gat hevi moa long karimaut ol kaunseling wok.

NUPELA SUPAMAKET BOSMAN



NUPELA BOS: MAHESH Patel, Menesing Dairekta bilong City Pharmacy (Siti Famesi), kampani husat i gat brens long olgeta senta insait long Papua Niugini, nau bai bosim olgeta bikpela stua bilong Steamships Treeding. Olgeta dispela bikpela supamaketa bilong Steamships em ol i kolim ol 'Stop N Shop' bisnis insait long Mosbi siti.

Mista Patel i tokaut olsem City Pharmacy i sainim pinis kontrak long baim olgeta Stop N Shop stua long mani mak bilong K20 milien.

Em i tok klia olsem olgeta nesanel wokmanmeri bai ken wok i go yet na bai nogat bikpela senis long ol mun i kam. Nau olgeta wokman bilong City Pharmacy bai abrusim mak bilong 1000. City Pharmacy bai go het long lukautim olgeta Stop N Shop bisnis tat long namel bilong dispela mun Oktoba na bai pinis bipo long Krismas. Long namba 12 de bilong mun Oktoba City Pharmacy bai i gat wanpela Seaholda Miting bilong kisim tok orait bilong Bod bilong ol.



PNG POWER Ltd i toksave long ol dispela kastoma bilong em long paim o stretim olgeta aut stendin pawa bil bilong ol insaite long wanpela ten fo (14) de bihain long dispela toksave i kamaut long ol niuspepa o PNG POWER bai kisim kot pepa bilong kalabusim ol o warent bilong kotim ol dispela lain.

Consumers	Meter no.	Location	Amount(k)	Payment	Balance
Yo! Robert	1895472	2 Mile	1,261.30	100.00	1,161.30
Robert Numbun	1912110	Morata	5,303.03		5,303.03
Pius Kuman	1867316	Morata	4,119.38	450.00	3,699.38
Maima Kama	2911662	Idubada	3,630.02		3,630.02
Abadeyamu Simon	2429976	East Boroko	3,462.43	1,731.00	1,731.43
Timothy Akepere	1912115	Garden Hills	2,686.08		2,686.08
Barry Tapio	1894829	Talai/Badili	2,675.48		2,675.48
Gilbert Sekepi	1866623	Morata	2,440.71		2,440.71
James Mamuan	1895923	Morata	2,278.10		2,278.10
Palus Paraka	No meter	Morata	1,545.26	200.00	1,345.26
Piuk Alex	2432140	Tokarara	1,969.57	811.60	1,157.97
Supa Belden Tabie	1835244	Hohola	1,761.53		1,761.53
Dickson Jupu	1866720	East Boroko	1,358.19		1,358.19
Kend Presely	1898055	Morata	2,101.33		2,101.33
Kapia Martin	1866651	Morata	3,318.70	200.00	3,118.70
Albert Nopu	1863630	Morata	3,255.29		3,255.29
Bill Kito	2431416	Morata	2,404.39		2,404.39
Kupa Hairi	1862352	June Valley	1,683.35		1,683.35
Parau Anthony	1910065	Gordons	1,677.32	300.00	1,377.32
Titus Jack	2439650		20,112.21		20,112.21
		Total	69,043.67	3,802.00	65,281.67

Sapos yu i no inap peim na stretim dispela pawa bil bilong yu, inap yu go long PNG POWER opis long Hohola na stretim tok tok wantaim ol long painim rot long stretim dispela pawa bil.

Rivaivel reli long stedium i go gut

.....sampela i kamap orait

OL Rivaivel senta long kantri i amamas long pinisim gut namba 12 Intenesenel reli bilong ol we 836 pipel i bin kisim baptais na kamap orait long ol kain sik ol bin gat long en.

Wanpela long ol em wanpela man ol i tok em i kisim blesing bilong Bikpela na kamap orait insait long preia reli i bin kamap long Sir John Guise Stedium long Septemba 23 inap long de namba 26. Dispela man i bin sindaun long wilsia long 12-pela yia.

Ol lain i bin lukim dispela samting i kamap i tok ol bin kirap nogut tru na Aiwara bilong ol i pundaun taim ol i lukim dispela man i wokabaut gut bihain long em i kamaut long wara em bin kisim baptais long em.

"God i gutpela na i oraitim mi bihain long 12-pela yia mi sindaun long wilsia. Nau, olgeta pen i pinis bikos God i mekim mi i kamap orait," dispela man i bin tokim ol pipel taim em i go antap long stes bihain long Baptais seremoni.



PRE LONG KAMAP ORAIT: Yangpela meri husat bodi bilong em i gat hevi wantaim papamama bilong em i sindaun long wilsia i wetim junia Pasto Godfrey Wippen na John Kujlmann long pre.

Narapela mauspas man long 20 krismas bilong Koiari i bin tok tok long namba wan taim bihain long em i kisim baptais.

Prinsipel bilong Rivaivel senta Pasto Godfrey Wippen na Siaman bilong Rivaivel Felosip Wolwaid i tok ol mirakel na ol sain em ol mak long inapim tok bilong Jisas long Buk baibel.

Em bin tok taim Jisas i stap long graun, em bin wokim ol mirakel, kamapim ol sain we i bin hat long pipel long bilipim. Na em bin tokim ol aposel bilong em long wokim wankain.

Em i tok ol samting we ol bin lukim i kamap long preia reli em inapim samting Baibel i toktok long en.

Prinses Anne amamas long PNG raun bilong em

Veronica Hatutasi i raitim

PRINSES Anne, em pikinini meri bilong Kwin Elizabeth bilong Ingran na hetmeri bilong ol Komonwel kantri we PNG i wanpela long em i amamas long gutpela welkam na pren pasin ol pipel i bin soim na givim long em.

Meri i save lukautim media bilong Prinses Anne em Ailsa Anderson i bin tokaut olsem taim em i tok-tok long wokabaut bilong Prinses Anne i kam long PNG long las Trinde apinun inap long Fonde apinun taim em bin go bek gen long Ingran bihain long em i pinisim 10-pela de raun long Saina, Is Timor, Indonesia na PNG.

"Prinses Anne i amamas long kam long PNG long namba tu taim. Em bin kam wantaim mama bilong em, Kwin Elizabeth long 1974 na dispela wokabaut i olsem kam bek gen bilong em. Em i laikim gutpela welkam na pren pasin ol pipel long PNG i givim em

long raun bilong em hia. Prinses i meri bilong hatwok na em i save givim taim bilong em long ol Sarili ogenaiesen we em i sapatim," Mis Anderson i tok.

Prinses Anne i sapatim wok bilong lukautim ol manmeri i gat binatang bilong AIDS, wik bilong daunim ol pasin bilong bagarapim ol meri na pikinini, strongim ol meri na ol i ken kamapim gut laip na sindaun na kontribuit long developmen bilong kantri. Olsem na long wanpela de stap long PNG, em bin raun i go long Anglikea HIV/AIDS Sapat senta, Famili Sapat Senta klostu long Pot Mosbi Jenerel Haus sik, Koki Wimen's Developmen Senta na Bomana Woa matmat.

Mis Anderson i tok Prinses bai kisim malolo long wanpela wik bihainim dispela raun i go long tripela kantri.

Kam bilong em long PNG em i olsem hap bilong 30 independens aniveseri selebresen na em i sanap makim Kwin husat i het bilong PNG tu.



KATIM RIBEN: Prinses Anne i katim riben olsem mak long opim hostel bilong ol meri long Cheshire Horn.

Long wankain taim tu, Mis Anderson i tok em i amamas long raun na stap long PNG we san i save stap strong na em gutpela tumas, i narakain long kol na nau, ren, long Ingran. Em tu i tok em i laikim

gutpela prenpasin bilong pipel long hia, ol gutpela kalsa bilas na gutpela welkam ol i kisim long olgeta ples ol i raun long sotpela taim long en. Wanpela bikpela sere- moni Prinses Anne i bin

stap long en em long givim ol namba wan luksave medol ol i kolim long "Logohu Awod" long Haus Palamen i go long ol lain i karimaut ol bikpela wok na sevis long komyuniti na kantri.

Gel Gaidis laikim moa yangpela meri

Veronica Hatutasi i raitim

ASOSIESEN bilong ol meri em Gel Gaidis Asosiesen i laikim moa yangpela pikinini meri i go insait long ogenaiesen bilong em.

Luania Kirori em Sief Komisina bilong PNG Gel Gaidis Asosiesen i tok.

Meri Wantok i bin bungim bikmeri ya long wokabaut bilong Prinses Anne taim em bin go lukluk raun long Bomana Wo matmat ausait long Mosbi long las wik Fonde bilong

Putim rit i flawa long givim luksave long ol soldia bilong Australia, Nu Silan na Ingran i bin dai long Wol Woa tu moa long 60 krismas i go pinis.

Ol Gel Gaidis na Boi Skauts i tupela long ol grup husat i bin tok

welkamim pikinini bilong kwin em Prinses Anne long lukluk raun bilong em i go long Bomana Woa matmat. Samting olsem 500 pipel i bin bung long hap rot i go insait long Bomana Woa matmat, ol skul na polis na Koreksenal Sevis lain long lukim Royel Prinses.

Ol sumatin bilong Marianvil Gels Sekonderi skul, De La Salle Bois Hai skul na Bomana Komyuniti skul i bin holim ol flek bilong PNG na Ingran na givim gutpela welkam long Prinses Anne.

Hetmeri Kirori bilong ol Gel Gaidis i bin wokabaut wantaim Prinses Anne taim em i go putim ritflawa i go long stetju bilong Hos Ov Sakrifais i makim olgeta dai soldia long Bomana wo matmat.



LAIKIM MOA MERI: Hetmeri bilong ol Gel gaidis long namel i singaut i go long ol moa yangpela meri long joinim Gel Gaidis.

Raun lukim ol meri na pikinini

PRINSES Anne, em pikinini meri bilong Kwin Elizabeth i bin makim mama bilong em na raun i kam las Trinde long PNG olsem hap bilong 30 independens aniveseri selebresen. Hia em sampela piksa em i raun lukim ol meri. *Ol Foto: NICKY BERNARD*



BOMANA WOK-ABAUT: Prinses Anne i toktok long ol skul sumatin bilong Marianvili Sekonderi. Ol bin givim gutpela welkam long pikinini meri bilong Kwin taim em i raun i go long Bomama Woa Matmat.



PRINSES NA MAN BILONG EM: Prinses Anne na man bilong em Etmirel Laurence na ol arapela bikman long raun bilong ol las wik long Pot Mosbi.



LAIKIM OL TRAN-GU: Het tisa long Cheshire Disebel Hom skul, Sophie Maram i amamas long gat sans long bungim Prinses Anne.

Lo bilong Lukautim ol Meri na pikinini

Skrum Save long Mentenens
Moa long Husat i ken aplai long Mentenens Oda

- Sapos yu marit na man bilong yu i gat mani tasol em i no save lukautim gut sindaun bilong yu, maski em i stap wantaim yu, yu ken aplai long mentenens. Bai mipela i tok moa long dispela bihain taim yumi toktok long Kastodi bilong pikinini bilong ol Mama i no Marit long Toksave pepa namba 3.
- Sapos yu marit anit long kastom lo, yu ken aplai olsem mama i no marit long kisim mentenens bilong pikinini tasol. Bai yumi toktok moa long dispela long Toksave pepa namba 3 bihain.

Kastodi em wanem samting?
Kastodi em rait bilong holim pikinini i stap wantaim yu. Kastodi oda em ol oda kot i mekim long tok husat bai kisim na holim ol pikinini, yu o man bilong yu.
Moa long neks wik

SOSEL sapat long HIV/AIDS lain

SAPOS yu gat binatang bilong AIDS na yu gat ol gutpela poroman, ol wari bilong yu i no inap bikpela bikos ol bai givim yu sapat. Na tingim, sapos yu gat AIDS, ol poroman bilong yu bai laikim yu yet. Noken lusim grup bilong yu hariap bikos yu gutpela poroman bilong ol yet. Yu wankain yet na yu gat planti samting we yu ken givim long ol narapela na skulim ol tu long en. Sapos wanpela pren i rijektim yu o i no laikim yu, noken pilim nogut. Sampela taim em yu tasol i gat dispela kain tingting na yu wari nating. Sampela taim em ol i no save wanem toktok ol bai mekim ol i no klia long dispela sik. Ol i ken pret tu nogut ol i kisim ol i gat binatang bilong AIDS.

Kuk Kona wantaim MERI WANTOK

Pis na Kaukau Sips

Yu Mas i Gat:

- 4-pela hap pis filei o pis mit i nogat bun long en
- 1-pela tebolspun Tredisenel Greivoks
- fi kap Tandako Kouting Miks
- 1-pela bans Pak Soi kabis
- 4-pela kaukau
- 1-pela kiau
- 1-pela tebolspun oil
- 1-pela kap wara

We long Kukim:

- 1-Katim ol pis filei o hap pis long longpela hap.
- 2-Dipim o putim i go insait long kiau we yu brukim na tanim na koutim i rabim wantaim Tandako kouting miks.
- 3- Praim long dip frai oil inap em i go golden braun.
- 4-Slaisim o katim kaukau i go olsem sips na dip praim inap em i go golden braun
- 5- Long wanpela prai pan, miksim gut Tredisenel Greivoks wantaim wara.
- 6- Boilim na tanim i go inap grevi i go tik o redi gut.
- 7-Kapsaitim antap long pis na sips na sevim.

STORI TASOL



wantaim

FR. PAUL LIWUN, SVD

AIDS i laik kilim olgeta

DISEPELA stori i wanpela trupela stori i bin kamap long Paris Siti long kantri Frans na long New Dehli long India. Wanpela wantok bilong mi i bin salim i kam long forum email bilong mipela. Nem bilong forum bilong mipela em i allesaja. Dispela forum i bilong SVD pater na Bruder bilong Flores na Timor Ailan bilong Indonesia, tasol nau mipela olgeta i mekim wok misin long olgeta hap bilong graun, insait long 5-pela kontinen.

Sampela wik i go pinis, insait long wanpela haus piksa long Paris, i gat wanpela man i pilim olsem samting i sutim as bilong em long sia em i sindaun long lukim piksa. Taim em i sanap, em i bin painim aut olsem wanpela nidel wantaim wanpela pepa ol i bin raitim olsem: "Nau tasol yu kisim infeksi bilong HIV AIDS".

Opis bilong helt dipatmen bilong Frans i bin mekim wanpela ripot na i tok olsem wankain nidel ol i no bin painim long planti pablik ples bilong siti na planti manmeri i bin kamap birua bilong dispela kain nidel. Ol i bin bungim olgeta nidel ol manmeri i painim wantaim dispela kain tok save bilong sik HIV AIDS, na ol i bin salim i go long laborator long wokim tes. Bihain long tes, ol save manmeri i bin tokaut olsem - ol nidel ya i gat binatang bilong AIDS.

Wankain opis tu i bin mekim ripot olsem planti manmeri i bin painim nidel long masin bilong rausim moni, (ATM). Olsem na ol i tokim ol manmeri i save yusim masin ATM long kisim o rausim moni bilong ol, i mas tukaut gut long dispela kain nidel i gat binatang bilong AIDS long en. Bipo long yusim sia na narapela pablik ples bilong sindaun, ol manmeri i mas lukluk na sekim gut pastaim.

Wankain samting i bin kamap long New Dehli siti insait long kantri India. Wanpela dokta i bin toksave olsem wanpela sikman bilong em i bin kisim binatang bilong AIDS insait long wanpela haus piksa. Dispela i bin kamap long wanpela yangpela meri i redi nau long marit wantaim wanpela man bilong ples bilong em yet.

Nidel i bin sutim as bilong em taim em i sindaun long sia insait long wanpela haus piksa. Taim em i rausim dispela nidel, i gat wanpela pepa i stap wantaim wanpela tok olsem "Welkam long famili bilong ol manmeri i gat sik HIV AIDS".

Taim ol famili bilong em i bringim dispela yangpela meri i go lukim dokta, dokta i bin mekim kliia tok i go long ol olsem dispela binatang bai nidim 6-pela mun bai go kamap long olgeta hap bilong bodi bilong meri. Isi isi tasol binatang bilong AIDS bai bagarapim olgeta sitem long paitim ol sik long bodi bilong meri. Dokta i bin tok kliia olsem, dispela meri bai stap laip inap long 5 o 6-pela yia moa. Tasol sapos yumi lukautim em gut, em i bai wnim planti yia moa.

Tasol sori long dispela meri. 4-pela mun bihain long em i bin kisim HIV AIDS binatang long nidel, em i dai pinis. Troma na wari i bin kilim em i dai hariap long wari long marit bilong em, wari long man em i laik maritim na planti moa narapela wafi bin kilim dispela meri.

Dispela stori bilong wantok bilong em i olsem wanpela tok lukaut long yumi olgeta long dispela sik HIV AIDS. Insait long kantri bilong yumi, i gat planti manmeri na pikinini i karim dispela kain sik. Tasol noken lusim tingting olsem planti manmeri na pikinini bilong dispela kantri tu i bin dai pinis long dispela sik AIDS tasol i bin kilim ol.

Nau mi askim yu, taim yu ridim pinis dispela stori, yu mas stori long olgeta wantok na poro bilong yu, olgeta pren bilong yu na narapela manmeri. Bai olgeta manmeri i mas stap redi na lukautim ol yet gut long dispela sik HIV AIDS.

Erīma sapatim kensa masin apil

Veronica Hatutasi i raitim

SEN Peter Sanel Peris Erima insait long Nesenel Kapitell Distrik em i namba wan Katolik Peris long Pot Mosbi Daiosis long go insait long kempin bilong kamapim mani long baim kensa masin bilong helpim ol meri na ol arapela long kantri.

Na kantri i mas sanapim wanpela kensa kaunsil, wankain olsem Nesenel AIDS Kaunsel long etresim dispela sik long nesenel level bikos planti lain, moa yet, ol meri i save dai long sik kensa.

Radio Terapi masin em dispela masin ol i save yusim long helpim ol meri i gat kensa bilong susu, kensa long bilum bilong bebi (sevikel kensa) na kensa bilong maus. Na wanpela kensa masin tasol insait long PNG i bin bagarap long 1996 na i nogat senis bilong em. Planti tausen meri i dai pinis bihainim dispela.

Long las Sande, Presiden bilong Nesenel Asosiesen bilong ol Meri Dokta em Dokta

...Nogat masin na planti meri dai

Mary Bonifasio i bin kamap long Sen Peter Sanel Erima sios bilong lonsim dispela fan resing wok sios na kongriksen bilong em i go insait long em.

Deputi Vais Siaman bilong Sen Peter's Peris Kaunsel Michael Varapik i tok peris i luksave long planti meri i dai na em i laik helpim long wei bilong em yet.

Em i tok ol mani sios i kisim long ol fan resing wok long dispela mun em ol bai givim i go long kensa masin fan resin apil.

Dokta Bonifasio stat yet long kensa masin i bin bagarap 9-pela krismas i go pinis, planti meri i kisim kensa bilong susu, bilum bilong bebi i dai. Na hevi long no kisim masin em nogat mani.

"Planti meri na ol kensa sik-lain i dai bikos nogat kensa masin. Mipela i tok sapos mipela i sindaun lukluk na i no wokim samting, moa pipel bai dai. Masin ya i no bilong

helpim ol meri tasol, nogat. Em i bilong helpim ol man na ol pikinini tu.

"Masin i bilong helpim ol sik-lain wantaim maus, susu na bilum bilong bebi kensa.

"Mipela i mas kamapim K3 bilien long kisim nupela kensa masin. Mipela i salim pas pinis i go long ol gavman minista na Palamen memba long givim helpim long mipela. Mipela i bilip olsem mipela i ken yunait wantaim gavman na wokim samting.

"Erima Katolik Sios em i namba wan sios we i kam insait long sapatim fan resing bilong mipela na mipela i amamas bikos mipela i bilip olsem Bikman i stap wantaim mipela," Dokta Bonifasio i tok.

Mista Varapik i tok peris grup bilong ol papa bai go pas long dispela fan resing apil. Na Papuan rijen i bin statim fan resing apil taim em i salim ol samting bihain long sios sevis.

Dokta Bonifasio i tok long olgeta yia insait long PNG, ol i save gat 15,000 nupela lain wantaim sik kensa. Na 12,750 pipel i save dai long dispela sik.

Em i tok sik ya em i namba tri top sik we pipel long PNG i save dai long em.

"I gat bikpela laikim long etresim (stretim) kensa isu long nesenel level. I mas gat kensa kaunsel, olsem tasol Nesenel AIDS Kaunsel.

"Kensa long bilum bilong karim bebi i save kamap long planti meri.

Na radio terapi masin i save wok gut tru long helpim ol meri wantaim dispela sik. Tasol yumi nogat dispela sevis nau long PNG bihain long wanpela masin tasol i bin bagarap long 1996.

"Long olgeta yia, 130 meri i save go long Pot Mosbi Jenerel Haus sik wantaim kensa bilong bilum bilong bebi na bikpela mak tru olsem 80 pesen i save dai bikos i nogat radio terapi kensa masin," Dokta Bonifasio i tok.

Skruiim stori long Kuk Ailans meri minista i kam long las wik. Laspela hap bilong em.

Meri Minista laik helpim ol yut na komyuniti

Veronica Hatutasi i raitim

MAMA Moetaua i tok tupela rol modol em i laikim tru long Baibel em Ruth na Esther bikos ol i gat gutpela skul long ol marit na famili.

Wanpela long ol bikpela samting em i lainim insait long skul na stap long Takamoa

...Em i painim PNG pasto pren bilong em

em senisim laip na strongim bilip, ol blesing em na famili i kisim na gat moa laik long wok na helpim ol yut, ol meri na komyuniti.



MAMA MOETAUA: Painim pasta pren bilong Papua New Guinea husat i pren bilong papa bilong em.

"Wanpela bikpela laik bilong mi em long go wok misin na ministri long Nu Silan namel long ol yangpela pipel na ol arapela we ol samting bilong graun i pulim tingting bilong ol na kisim ol bek long save long Bikpela na kam bek long banis bilong em. Wankain tu long Kuk Ailans we tude, planti yangpela pipel i no save long Bikpela," Mama Moetaua i tok.

Nau, ol Takamoa sumatin i wok hat i stap long pinisim ol rises, ol

eksam na greduesen long mun Novemba.

Mama Moetaua na man bilong em Ina Moetaua i kisim tok pinis ol bai skruiim skul bilong ol gen long Pasifik Tiotojikel Kolis long Suva Fiji long tupela yia stat long neks yia.

Taim Mama Moetaua i amamas long dispela, em i tok ol i mas go malolo gut pastaim long ples bipo ol i go long Fiji.


Em i tok laip i hat long kolis, moa yet long saat

bilong mani bikos ol i nogat wok na ol i mas lukautim famili bilong ol tasol wantaim gutpela sapat bilong ol famili na kongriksen long Avarua.

Sios long Kuk Ailan i gat koneksen wantaim PNG bikos ol misinari bilong ol i bin karim lotu i kam long PNG, moa yet, long Papuan rijen. Nem misinari Ruatoka i kamap bikpela na wanpela sios long Hanuabada i kolim bihain long em i bilong Kuk Ailan.

Mama Moetaua i gat wanpela koneksen wantaim PNG. Em i askim *Wantok* long painim wanpela pasto, Pasto Badira Henao em poroman bilong papa bilong em, Atingakau Tangatakimo, sios pasto. Papa i bin dai long 1999.

Lasbon pikinini bilong Mama Moetaua em i givim nem Badira bihainim dispela PNG pasto poroman bilong leit papa bilong em. Sapos yu husat long pablik i save long dispela pasto, ringim Veronica long *Wantok Niuspepa long telipon namba 3252500. Postel etres em, P O Box 1982, Baroko, NCD.*



"YUMI MAS TAITIM BUN NA SANAP STRONG"

Yupela i mas wok strong long bihainim pasin bilong sindaun gut na stap bel isi wantaim olgeta man. Na yupela i mas wok strong long givim laip bilong yupela long God na bihainim pasin holi bilong God. Man i no gat pasin bilong God, em bai i no inap lukim Bikpela. Yupela i mas was gut, nogut wanpela bilong yupela i pundaun na i lusim marimari bilong God. Na nogut wanpela bilong yupela i kamap olsem diwai i karim kaikai i gat pait, na em i glvim hevi long yupela na mekim yupela i kamap doti long al bilong God.

HIBRU 12: 14-15

GLASIM TOK



wantaim

BISOP PETER FOX

Givim bikpela luksave

RAUN bilong Prinses Anne i kam long Pot Mosbi las wik i sans bilong luksave planti man i gat long sevis we PNG na Komonwel i givim long en.

Long san, Her Royel Haines i bin lukluk raun i go long Anglikea Senta we i save helpim na sapotim planti manmeri i gat binatang bilong sik AIDS, Cheshire Homs we ol i lukautim ol disebel pipel, Famili Sapot Senta long Pot Mosbi Jenerel Haus sik we ol i helpim ol meri lain i i kisim hevi na bagarap long domestik vailens o ol man i paitim na kamapim bagarap long ol na Koki Developmen Senta we planti i kisim nupela hop, trening na save. Bisi de bilong Prinses i bin pinis long haus papamen we em bin givim namba wan Logohu awod o luksave aninit long sistem bilong PNG yet long ol manmeri i givim gupela sevis i go long komyniti na kantri.

Praioriti o bikpela lukluk na tingting we Prinses Anne i bin givim long ol ogenaisesen i save lukautim na helpim na givim luksave long ol lain i givim sevis i go long ol narapela i mak long mekim yumi i mas tingting olsem em i bikpela samting bilong luksave long ol lain i sevim gut kantri.

Long mi yet, lukluk raun long Bomana Woa matmat, em namba wan hap we Prinses Anne i bin statim wokabaut bilong em i bin gat bikpela samting long mi.

Mi bin sindaun wantaim sampela long ol Woa Veteran o lain i bin pait long Namba Tu bikpela pait, pipel i bin poroman bilong sampela ol i dai pinis na i stap long matmat.

Maski em i no malolo long dispela de bikos em i raun long planti hap, em bin gat taim long toktok long ol lain long olgeta ples em i lukluk raun long em.

Em bin mekim klia long ol olsem em i luksave long ol long sakrifais ol i mekim long lukautim na sevim ol narapela.

Taim mi tingim ol samting we ol lain i bin go long em long sevim dispela kantri, ol pen, ol birua, em bin salim bikpela pret long bun bilong mi.

Taim mi lukluk long ol planti waitpela hetston i makim matmat bilong pikinini, brata na man em i stap insait long matmat ya, mi tingim fridom yumi gat long em nau we dispela lain i bin pait long lukautim na lusim laip bilong ol long em. Ol lain i bin dai long yumi.

Mi amamas olsem Prinses Anne i luksave long dispela bikos em i isi long yumi i lusim tingting hariap.

Em i stap long tingting bilong yumi wan wan long tingim bek na givim luksave ol lain i bin sevim PNG long taim bipo na askim wanem samting yumi ken wokim nau.

Olsem JF Kennedy i bin tokim ol manmeri bilong Amerika olsem, "noken askim wanem samting kantri i ken mekim long yupela, tasol wanem samting yumi ken mekim long kantri bilong yumi."

Namaliu amamas long ol sios

Aloysius Laukai i raitim

FOREN Afes Minista na Kokopo memba long Nesenel Palamen Sir Rabbie Namaliu i tok amamas long Katolik na ol arapela sios long kontribusen bilong ol long developmen o wok go het bilong kantri.

Sir Rabbie i wokim dispela toktok long 100 yias selebrensen las wik Sande bilong Katolik Sios i kisim lotu i go long Duk ov Yok Ailan insait long Is Nu Briten provins.

Sir Rabbie i bin tok ol sios em ol namba wan lain long kisim ol sevis na skulim ol pipel bilong yumi bipo gavman i kirapim wok long ol ples.

Em i tok PNG i gat 30 krismas na em i gat planti samting yet long lainim long wok bilong ol sios long kantri.

Sir Rabbie i bin givim luksave tu long ol misinari bilong Amerika i bin go pastaim na planim Tok bilong God long

...Provinsel Gavman givim K10,000

Duk ov Yok na ol wok ol bin mekim i karim kaikai tude bikos ol pipel i skruim wok we ol olpela misinari i bin kirapim long en.

Em i luksave tu long sapot na helpim ol namba wan misinari i bin givim long namba wan na tu bikpela wol pait.

Sir Rabbie i tok gavman bai go het na wok wantaim ol sios long sevim pipel na kantri.

Em bin tok gavman i no inap wok em yet na planti skuul na haus sik insait long kantri em ol sios i ranim tasol gavman bai helpim wantaim mani long go hetim ol wok bilong ol.

Long wankain taim tu, Bisop bilong Kavieng/Lorengau Katolik Daiosis, Bisop

Ambrose Kiapseni i bin tok amamas long ol pipel bilong Duk ov Yok Ailan long wokim selebrensen bilong 100 yia aniveseri bilong Katolik Sios long hap.

Insait long ol toktok em i wokim long Milamila Peris long Duk ov Yok we ol selebrensen i bin kamap, Bisop Ambrose tok tenkyu long ol pipel long soim yunite namel long ol pipel long ailan husat i bilong ol narapela sios. Ol Yunaitet, Seven De na ol arapela liklik sios tu i bin bung wantaim ol Katolik Sios memba long Milamila long selebretim 100 yias aniveseri bilong ol.

Bisop Ambrose i tok taim bitong putim banis namel long

ol narakain sios na grup i nogat moa na ol pipel bilong Duk ov Yok i soim trupela spirit bilong ol Kristian taim ol i wok bung wantaim ol narapela sios long tingim de ol namba wan misinari i bin kamap na planim Tok bilong God long ailan.

Is Nu Briten Gavana Leo Dion taim em i tok tenkyu long Katolik Sios na ol pipel bilong Duk ov Yok i bin tok gavman bilong em bai wok klostu wantaim ol sios long kisim moa sevis na developmen i go long ol ruel komyniti we planti pipel i stap long em.

Is Nu Briten provinsel gavman i bin givim K10,000 i go long Senteneri Selebrensen komiti long ailan.

Moa long 10,000 pipel i bin stap insait long selebrensen i bin kamap long las Sande long Milamila Peris insait long Mioko Ailan, long Duk ov Yok grup.

Join ripot bilong Katolik na Lutheran Sios

WOK Bung namel long Katolik na Lutheran Sios long wol i wok long go gut na klostu taim, ol bai kamap wantaim wanpela ripot tupela i wok long em.

Holi Si (Vatiken) na Lutheran Wol Federesen (LWF) i klostu pinisim ripot long wanpela join dokumen i sut long ol aposel na wok bilong ol.

Ol memba bilong Roman Katolik na Lutheran Sios Komisn i wok bung long dispela dokumen ripot. Pontifiket Kaunsel long Promotim Kristen Yunite em i go pas long bung i stretim ol ripot bipo ol i pinisim gut i lukautim bung long dispela samting.

Ol memba bilong Komisn i wok long glasim na skelim draf ripot we ol i ting bai redi long pablisim long neks yia.

Ol wok bung toktok long dispela samting namel long tupela sios i bin stat long yia moa long 30 krismas i go pinis, long yia 1967. Na Lutheran Roman Katolik Komisn long Yunite i karimaut ol wok aninit long lukaut bilong LWF na Pontifiket Kaunsel bilong Kristen Yunite.

Miting long dispela wik em laspela hap bipo ol i wokim fainol ripot bilong ol. Ol wok ripot na eria we tupela sios i wok bung wantaim na kamapim em long "The Eucharist (1978) Ways to Community (1980), The Ministry in the Church(1981) na Facing Unity (1984). Long yia 1999, ol bin raitim kamap wanpela dokumen long jastifikesen we i bin stretim i no wanbel wantaim Martin Luther na dispela we Metodis sios i laik lukluk long en neks yia, Kadinel Walter Kasper em Presiden bilong Pontifiket Kaunsel bilong Kristen Yunite i tok.



STRONGIM KRISTEN KOMYUNIKESAN: Olpela presiden bilong Wol Asosiesen bilong Kristen Komyunikesen (WACC) long Pasifik rijen em Pater Larry Hannan, Jenerel Seketeri bilong Wol WACC het opis long London Dokta Randy Naylor na Minista bilong Riliejn long Kuk Ailan Palamen Peri Vaivaipare insait long Pasifik rijinel bung long Rarotonga, Kuk Ailans.

Papua Distrik Lutheran holim bung

Paulus Tali raitim

KLOSTU long 400 Lutheran Sios memba bilong Papua Distrik i bung nau long toktok long wok bilong sios na rot em i ron long em.

Ol bai wokim ileksen long makim ol nupela Eksekutiv bilong go pas long wok bilong Papua Distrik long tupela yia i kam.

Konferens i bin stat long Trinde dispela wik long Imanuel kongrigesen insait long Nesenel Kapitel Distrik na bai pinis long Sande Oktoba 9.

Ol deleet i kam long ol ples i stap ausait long NCD olsem Kerema, Tabubil, Alotau na Popondeta Lutheran Sios seket.

Hetman bilong Imanuel kongrigesen Dokta Tongos Epos Zanggo, i tok ol bikman long gavman olsem Gavana Jeneral Sir Paulias Matane, Dokta Ninkama Moya em Siaman bilong Nesenel AIDS na Polis Komisina Sam Inguba bai toktok long sait bilong lo na oda na kram insait long kantri long dispela taim.

Dokta Zanggo i tok ol deleet i peim K30 fi bilong ples bilong slip na kaikai long em.

Foto: VERONICA HATUTASI

TOK LUKAUT



wantaim

DAVID EPHRAIM

Ol lida, harim krai bilong ol pipel

BKPELA toktok i wok long kamap long traim stopim dispela nupela bil o lo we Mema bilong Lagaip/Porgera i laik bringim i go insait long Palamen kibung long Oktoha.

Long sampela mun i go pinis wankain bel krai bilong ol Green Peace wantaim ol sampela papagraun i bin traim long stopim dispela nupela forestri bil tasol dispela i no bin kamap. Planti bilong ol palamen lida i bin tok bai ol i no inap long sapotim dispela bil tasol dispela tok-tok bilong ol em i no kamap.

Nau yet wankain krai bilong pipel i kamapim mi long skelim dispela pasin ol lida bilong yumi wokim na mi no save sapos tru tru ol lida i save tingting long ol krai bilong ol pipel.

Sapos yumi laik senis yumi wan wan manmeri bilong Papua Niugini tude i mas sanap strong na kamapim ol rot bilong stretim ol sevis we yumi lukim i no stret. Olgeta taim yumi save wet long gavman na yumi no save traim helpim stretim ol ples na komyuniti yumi stap long en.

Long kirapim gutpela sindaun pipel i mas kism risponsibiliti. Taim yu lukim samting i no stret yu mas tokaut. Planti taim bel krai bilong pipel i no save go aut tumas bikos long kainkain as tasol wanpela samting em rot we planti samting yumi save long en em Nius bisnis. Long kantri planti bilong ol nius bisnis em bilong ol narapela kantri bisnis manmeri. Na planti taim ol bai putim rul bilong ol yet long ripot na dispela em bai hat moa sapos dispela kampani i tingting long bisnis bilong en.

Yumi mas skelim dispela tu na traim kamapim rot bilong bringim aweanes na skul i go long ol pipel bilong yumi. Wanpela rot em baim Wantok Niuspepa em pepa bilong yu stret na tu em i kam long tok pisin we em i lewa tokples bilong yu.

Olsem bipo mi tok sapos yumi toktok tasol na i no wokim kamap rot bilong senisim samting we yumi lukim i no stret bihain bai yumi lukim bikpela hevi. Olsem na Wantok taim nau bilong sanap wanbel wantaim long stretim na putim gut bek kantri bilong yumi. Kantri i no stap long han bilong Gavman nogat em stap long yumi ol pipel. Sapos yumi no laikim Gavman orait yumi mas senisim.

Ol Stori na piksa long Nesenel Edukesen wik wantaim Veronica Hatutasi

Sapotim ol laibreri na yangpela long infomesen em bikpela samting

Veronica Hatutasi i raitim

SAPOTIM ol bakstua bilong save o ol laibreri em bikpela samting long helpim pipel bilong go insait long ol wok developmen na tu, skruim na kamapim gut save na sindaun.

Gavana Jenerel na Gren Sief Sir Paulias Matane i bin tok olsem long opim wanpela wik Nesenel Edukesen Wik 2005 long Godons Sekonderi Skul long Pot Mosbi long dispela Tunde.

Ol skul insait long kantri bai wokim ol ektiviti long luksave long het tok bilong Nesenel Bukwik, em long 'Ol Laibreri na Literesi: Promoting na Strongim Lainim o Skul long Laip bilong Olgeta' long dispela wik.

Long wankain taim tu, Sir Paulias i bin skruim het toktok long kantri i mas

sapotim strong faundes bilong edukesen na raits bilong ol pikinini.

Em bin tok wanpela bikpela samting ol pikinini i mas gat em long infomesen bikos taim ol i gat save, go insait long ol toktok na ol samting we bai helpim ol long inapim driman na got bilong ol, ol wari, ol i ken abrusim ol birua na hevi na samting dispela i ken helpim ol wok developmen.

Em i tok infomesen na developmen i patna gut wantaim na bikos ol laibreri em ol stoa haus bilong save ol pikinini na ol skul i kism save long en, ol laibreri i mas kism gutpela sapot.

"Mi mas tok gen bilong gat rot long kism infomesen i bikpela samting. Piksa em planti yangpela pipel namel long 15 na 24 krismas i no klia long rot we HIV/AIDS i kalap i go long narapela. Gutpela skul, save long rit na rait bai helpim tru ol pikinini long save na abrusim na wokim ol gutpela disisen na lukautim ol yet gut", Sir Paulias i tok.

Em bin tokaut long sampela bikpela wari bilong 40,000 pikinini ol bin painimaut insait long wok sevei long 72 kantri we yumi long PNG i gat tu na i mas lukluk tu long ol.

Taim planti long ol pikinini na yangpela i amamas long gutpela stap wantaim ol papamama na tisa na ol i luksave long hevi bilong mani na envaironmen, bikpela wari ol i bin autim long en em long vailens bagarap na sindaun nogat insait long famili, skul na ol neiba, i no wokim gut long ol trangu, disebel

na ol pikinini.

Wari long nogat wok na mani, nogat gutpela infomesen long HIV/AIDS na pasin bilong pren na slip wantaim patna, long gavman i mas givim bikpela sapot long kwaliti edukesen, ol yangpela i nogat gutpela sans long autim ol tingting na i no wanbel long sampela pasin tumbuna na pilai politiks em ol narapela bikpela wari tu ol yangpela i autim long en.

Sir Paulias i bin tok em i no gutpela piksa tru long planti pablik na skul laibreri insait long PNG i pas na i mas gat sapot nau long strongim ol dispela i wok.

"Bipo long indipendens, i bin gat 90 skul laibreri tasol i kam inap nau, planti i no moa stap.

Olsem na em i askim strong ol lida bilong bihainim eksampel bilong Dame Kidu we laibreri projek bilong em long Koki em Prinses Anne i bin opim las Fonde.

Em bin askim ol sumatin na pablik long lukautim kalsa, ol tumbuna stori na ol arapela bikpela toktok bilong ol wanpela rot em long raitim long buk na em bai i no inap lus.



SIR PAULIAS: Sapotim save haus bilong save na infomesen



GIVIM LUKSAVE LONG OL TISA: Long makim Wol Tisa De, Komisina Michael Pearson i toktok long bikpela wok ol tisa i save mekim.

Ol sumatin kism salens

Veronica Hatutasi i raitim

SALENS i go long ol sumatin long stadi gut na kontribuit long ol wok bilong go hetim gut kantri.

Eking Edukesen Seketeri Luke Taita i bin tromoim dispela salens long opim Nesenel Bukwik long dispela Tunde.

Long wankain taim tu, Mista Taita i bin salensim ol tisa, ol papamama na haislain long skulim ol famili memba bilong ol i no save long rit na rait.

Mista Taita i bin wokim wankain toktok olsem Gavana Jenerel long sapotim ol laibreri bikos ol i stoa haus bilong save we ol sumatin na jenerel pablik i kism gutpela infomesen long skruim save long ol samting i kamap long kantri na wol na tu, kontribuit long kantri i go gut.

Em bin tok save long rit na rait i save opim ol nupela sans long ol skil i strongim pipel, ol famili na komyuniti long kamap "self reliant" o mekim ol samting long helpim ol yet.

Em bin tok Edukesen sistem i

sapotim gol bilong Nesenel Gavman long kamapim gut sosel na sait na wok mani na edukesen sistem i gat bikpela wok long sapotim gavman inapim gol bilong em long gavman i bihainim stretpela pasin na wok gut long olgeta level, kism sevis i go long ol rurel eria, daunim trangu pasin na developim humen risos.

Mista Taita i tok aninit long nupela 10 yia Nesenel Edukesen Plen, ol bai go het long pinisim besik edukesen na go het na dispela bai givim sans long moa pikinini i go long skul.

Long strongim poin olsem laibreri i bikpela samting long edukesen na save long rit na rait, em bin autim tok bilong Clarence Day olsem nogat narapela samting we man i kamapim i gutpela moa olsem ol buk bikos samting em i raitim bai stap oltaim, maski ol kantri i pundaun, ol bikpela samting i feil, man i dai.

"Long wol bilong ol buk, ol samting i stap yangpela, laip na fres olsem ol i kamap tude tasol i toktok long samting i kam long lewa bilong man i dai planti handret yis i go pinis.



HARIM GUT: Ol Godons Sekonderi sumatin i harim ol toktok long opim Nesenel Edukesen wik seremoni long skul bilong ol.



Salim ol pas i kam long WANTOK NUSPEPA: P.O. Box 1982, Boroko N.C.D 111 Fax: 325 2579 Email: word@global.net.pg

Ol Hailans mas harim tok bilong Stanley Kewa

Dia Edita

MI AMAMAS tru long lukim long Wantok Niuspepa bilong Septemba 29, 2005 long dispela man Hailans i givim gutpela toktok long ol narapela Hailans manmeri.

Mi lukim olsem sapos planti manmeri bilong Hailans i save tingting olsem dispela man Stanley Kewa, bai PNG i stap gut stret.

Olgeta toktok em i mekim i tru. Em i hat tru long mipela ol nambis lain i kam na sanapim pos bilong haus na raun raun nambaut long antap. Mipela bai kisim bikpela birua long dispela. Tasol yupela i laik kam daun, yupela i save wokim samting long laik bilong yupela olsem ples bilong yupela. Nogat sem bilong yupela. I no olgeta Hailans i save mekim dispela. Sampela bilong ol em ol gutpela lain.

Em tasol na plis harim tok bilong Stanley Kewa na stat rispektim ol papagraun bilong nambis.

ABLE YAWII
ERIMA
NCD

Komyuniti polis long Sepik i nambawan

Dia Edita

MI WANPELA manki Yangoru na mi laik tok olsem olgeta pipel bilong Sepik i amamas tru long ol gutpela wok kamap bilong komyuniti polis. Wok bilong ol i winim tru ol regula polis.

Tru nau mi laik tok olsem olgeta lain save tok Sepik em ples nogut na ol i save pret long kam raun. I gat planti raskol, bikhet na kilim man nating long strit i save kamap strong tru na Gavman i pret long salim strongpela wokman olsem polis kam wok long Sepik.

Nau mi amamas tru long gutpela wok kamap bilong komyuniti polis na planti bikhet pasin wok long go pinis nau. Wok bilong regula polis ol i save lukluk raun tasol na nau wok tru i save kamap long komyuniti polis gut stret. Ol i save sekim bek na poket bilong man long drak wantaim stim. Mi laik raitim dispela sotpela pas i go long Wantok Niuspepa na tokim bosman bilong Royel PNG Polis Konstabulari long tok strong long go het yet wantaim wok bilong komyuniti polis insait long Sepik bikos Sepik em i ples nogut.

Nau mi laik tok strong i go long Gavman mas lukluk na apim pe bilong Komyuniti Polis i go antap long wanem ol i save stopim bikhet pasin insait long Sepik.

JACOB YUASI
YANGORU
IS SEPIK PROVINS

Gut wan long yu Bismark Maritime

Dia Edita

MI LAIK raitim dispela tok amamas pas i go long Bosman bilong Bismark Maritime kampani long baim dispela nupela pasindia bot long Pilipins.

Dispela toksave bilong ol long Wantok Niuspepa i bringim bikpela amamas long mipela ol lain long Lae i save laik raun long Pot Mosbi na kambek long gen long Lae long mani mak we i gutpela. Na tu long dispela taim we Lusip i wok long katim daun sampela ron bilong ol sip bilong ol, nau bai Bismark Maritime i ken givim sevis long ol dispela ples na taun.

Mipela i save painim hat long balus long taim bilong Krismas, nau mipela bai yusim gut dispela nupela pasindia sip bilong Bismark Maritime.

Gut wan long yu Hamish Sharp wantaim olgeta wokmanmeri bilong yu.

NAREEDA SAHARIHENG
LAE
MOROBÉ PROVINS

Buai na plastik bagarapim siti

Dia Edita

MI LAIK autim tingting bilong mi em i olsem. Namba tri siti bilong PNG, Maunten Hagen em i bagarap tru long pipia bilong buai na ol plastik bilong pulumapim kaikai bilong stua. Na em i luk nogut tru.

Ol narapela siti o taun bilong yumi PNG i wankain tasol. Yu wanem

kain lida i stap long Nesenel Gavman o provinsel gavman yupela mas wokim disisen long tupela bikpela samting hia.

Na sapos yupela i pasim tupela bai siti o taun bilong yumi bai stap klin olgeta taim na ol manmeri bilong narapela kantri i kam na lukim raun

long siti na taun bilong yumi.

Ol bai amamas long lukim PNG. Em tasol. Yu husat brata o susa i laik sapotim raitim tasol long Wantok Niuspepa na mipela lukim.

MARK LUPI
MT HAGEN
WESTERN HAILANS
PROVINS



Toksave: Sampela ol pas mipela i kisim i longpela tumas na i no givim spes long ol arapela pas, plis raitim liklik pas. Na tu putim nem na adres bilong yu long olgeta pas yu salim i kam, tenkyu. - Edita

Memba bilong Sandaun harim krai bilong pipel

Dia Edita

MI YAMARI Mulex bilong Yangok i kam gen long autim ol wari bilong Yangok pipel i go long ol Memba bilong Aitape Lumi na Nuku olsem, ol memba bilong bipo na nau ol i stap long tude Gavman, yupela save lukluk long ol wari bilong ol pipel tu o nogat?

Nau yumi gat tripela ten krismas pinis, tasol mipela pipel bilong Lumi na Yangok i no kisim gutpela sevis liklik. Nogat tru.

I luk olsem wanpela nupela Memba bilong Aitape Lumi tasol em i gat luksave long ilektoret bilong em na mekim wok kamap.

Tasol ol memba bilong Nuku bilong bipo na nau i nogat luksave long pipel bilong Yangok. Tupela memba ya i save tingim Nuku tasol na ol wantok na wanples tasol. Wankain pasin tu i go long Gavana bilong Sandaun. Yu save toktok planti tasol nogat luksave bilong yu long pipel bilong Yangok.

Taim yu stap nating long ples yu mekim switpela toktok i go long pipel long votim yu. Tasol nau tok promis bilong yu i go lus nating. Trangu ol pipel bilong ples i westim bikpela kaikai tru long sapotim wok kempein bilong yu. Dispela ol liklik hendaut mani yu givim i go long wan wan grup i no inap helpim olgeta pipel.

Ol bikpela samting tru bai helpim ol pipel, em hia nem bilong samting, rot sevis, komunikesen, liklik ples balus, benk, pos opis, etministresen opis na sampela moa i stap mi no raitim.

Makim maus bilong pipel bilong Nuku, Lumi na Yangok mi askim 4-pela memba wantaim gavana bilong Sandaun yupela mas kamapim wanpela tingting na fomim wan bodi, wan spirit na sapotim ol arapela manmeri long wokim wok kamap na harim krai bilong pipel.

Em tasol em ol wari bilong Yangok na Lumi pipel.

Yu husat brata o susa i laik sapotim o agensim rait tasol long Wantok Niuspepa na mi ken lukim.

YAMARI MULEX
YANGOK DISTRIK
SANDAUN PROVINS

Bekim pas bilong Robert Naio

Dia Edita

MI LAIK kisim dispela taim na bekim pas bilong brata Robert Naio bilong Nabak i bin raitim kamap long Wantok Niuspepa long 14 Epril 2005. Brata mi laik askim yu pastaim. Yu save stap long Australia na i kam o yu save i stap long ovasis na i kam long Papua Niugini?

Yu save harim nius long redio o baim niuspepa na ritim tu o nogat? Hevi Papua Niugini i bungim long sait long mani i bikpela tru em yu save o nogat? Sapos yu no save orait mi bai tokim yu na yu mas harim gut.

Hamas Gavman i bin kamap bipo ol i bin dinau long Wol Benk na mak bilong dinau i sanap olsem long K8.6 bilien em tu yu save o nogat? Taim Somare Gavman i bin kamap long yia 2002 i wok long bekim dinau isi isi na dinau mak i sanap long K7.5 bilien long dispela yia. Olsem na liklik mani Nesinol Gavman i save givim mi long developim na sevim ol pipel bilong Nawaeb ilektoret em yu nogat luksave.

Sapos yu laik save moa long developmen i kamap na sevis mi wok long givim i go long ol pipel bilong Nawaeb ilektoret orait yu mas askim Songang Luther Wenge, Gavana bilong Morobe na em bai tokim yu stret. Mi wanem kain man na mi husat. Brata yu tok long mi olsem mi maus pas, tasol yu go long palamen Haus na yu lukluk tru long hansat o ripot bilong Palamen Haus i gat sampela askim mi bin askim long ol minister na Praim Minista tu ya. Sapos yu no save mi tokim yu. Ating yu bin raun long Palamen Haus long wanpela taim tasol na yu lukim na raitim dispela pas long Wantok Niuspepa.

Mi laik tokim yu olsem manus i save pairap tumas olsem emit dram na nogat developmen na sevis em maski em samting bilong sem ya.

Las 25 yias yu Nabak yu kisim pawa na i stap na pairap tumas long maus na developmen na sevis i no kamap gut long Nawaeb ilektoret em samting bilong sem ya. Rot bilong kisim mani bilong developim ilektoret na givim sevis long ol pipel bilong Nawaeb em i no inap yu maus pairap tumas na kisim mani. Nogat.

Hevi na pen, sore na krai long ol tran-gu lain pipel bilong Erap i save karim na pilim olsem na ol i bin askim God long kamapim lida long helpim ol. Long dispela rot tasol ol pipel bilong Erap i bin kamapim mi long karim hevi bilong ol. Tasol mi no save karim hevi bilong ol pipel bilong Erap tasol, nogat. Mi save karim hevi bilong ol ol pipel bilong Nawaeb olgeta. Mi wanaim ol pipel bilong mi long Erap i tok bikpela tenk yu i go long God Papa long dispela sans wok lidasip em i givim mipela i bihainim singaut bilong mipela tru long prea.

Bilong bekim olgeta pas bilong yu, em yu tok long wokim rot na askim ol pipel long kisim mani. Brata mi laik tokim yu stret olsem, dispela masin bilong wokim rot em i praiwet masin na taim mi no kamap memba yet na mi bin baim. Yu no ken ting olsem mi save yusim dispela masin na mekim wok na kisim mani bilong Provinsol Gavman. Nogat. Mi save sore long ol pipel bilong mi long Erap na mekim wok nating long helpim ol. Wok bilong lukautim masin na pats na disil em i no isi em i save kostim bikpela mani.

Em bai kostim yu milien na milien kina long wokim rot. Sapos yu pasim han bilong yu na wetim gavman tasol bai yu no inap kisim sevis. Dispela rot bilong wok bung wantaim na helpim narapela em mipela ol pipel bilong Erap i save mekim na i no save wetim gavman tasol.

MEMBA BILONG NAWAEB



WANTOK KOMENTRI

Bil i gat as tingting, tasol pipel bai karim hevi

WANPELA memba husat i laik kamapim ol senis long Mama Lo i tokaut long as tingting bilong em pinis.

Andrew Kumbakor, Memba bilong Nuku i tokaut pinis olsem as tingting bilong em long laik apim mak bilong diskreseneri mani o mani gavman i save gimim long ol memba bilong kamapim wok developmen insait long distrik, em long karim moa sevis i go insait long ol bus ples.

Mista Kumbakor i tok long ples Nuku, i nogat hanmak bilong ol gavman sevis olsem helt, edukesen na ol arapela.

Em i tru olsem ol pipel insait long ol liktik bus ples insait long kantri i gat hevi long sait bilong lukim wok bilong gavman.

Tasol bikpela tok agensim dispela senis bilong Mista Kumbakor na narapela bil bilong memba bilong Lagaip/Porgera, Kappa Yarka, em long ol asua i ken kamap long bihain taim sapos dispela tupela bil i kamap lo.

Mista Kumbakor i tok kia olsem ol manmeri i noken toktok long tupela bil wantaim. Ol i mas lukluk long bil bilong em na bil bilong Mista Yarka olsem tupela bil.

I tru olsem dispela tupela bil i kam long tupela arapela memba. Tasol hevi bilong dispela tupela bil, em tupela yet bai no inap karim. Nogat. Olgeta pen bilong dispela tupela bil bai pundaun antap long baksait bilong ol pipel bilong kantri.

I gat wanpela moa yia i stap bipo long nesenei ileksen long 2007. Bikpela toktok i kamap long dispela tupela bil long wanem planti i askim. Bilong wanem tru na ol i no laik kamapim dispela bil bilong apim mak bilong ol diskreseneri mani long stat bilong taim bilong ol long palamen? Na nau i gat wanpela yia tasol i stap bipo nesenei ileksen. Olsem wanem? I no inap wet inap ileksen i kamap pastaim na ol i senisim lo?

Mista Kumbakor i autim kraik bilong ol pipel bilong em. Na dispela kraik, ol arapela pipel insait long ol liktik bus ples i save long en.

Tasol sapos ol memba i tingting long kamapim dispela lo, ol i mas tingting gut long strong bilong wan wan memba long yusim gut dispela K1.5 milien.

Long sait bilong Mista Yarka planti tokwin i raun nau olsem em i no tokaut long as bilong kamapim dispela bil long wanem i gat ol arapela biknem man husat i bin tokim em long kamapim. Maski dispela tokwin i tru o nogat, hevi bilong dispela bil long bihain taim i no gutpela liklik.

Sapos Mista Yarka i tingting planti long dispela pasin bilong ol lida long go sanap kot maski ol i no asua, i gat rot bilong stretim ol dispela samting.

Wanpela rot em long stretim wok bilong Ombudsman Komisaris na long strongim rot we ol i ken salim ol bikman i go long publik prosekuta.

Dispela bai i ken glasim gut ol asua bilong ol lidaman na sekim sapos i gat inap as long salim ol i go long publik prosekuta.

Nau i stap long han bilong ol wan wan memba bilong palamen long skelim gut tingting bilong ol long dispela tupela bil taim ol i go long palamen long dispela mun.

K1.5 milien bilong LLG na i no memba

SAPOS olgeta memba bilong palamen i ken kisim K1.5 milien bilong distrik bilong ol em i no wanpela bikpela samting. Bikos ol i ken stretim pepa wok tasol long Ogenik Lo na wantu tasol bai dispela mani i kamap long distrik treseri opis bilong ol.

Tasol bilong wanem na ol i laik kisim dispela mani long 2006?

Inap ol i wet pastaim na 2007 nesenei ileksen i pinis pastaim orait ol i ken mekim dispela.

2006 em wanpela yia tasol long go insait long nesenei ileksen na tru tumas ol memba i laik kisim bikpela mani long mekim wok long distrik bilong ol.

Olgeta pipel bilong ples i save pinis olsem olgeta projek ol memba i save kamapim long distrik em bilong apim nem bilong ol memba na gimim ol moa biknem tasol. Biknem na namba i save kam wantaim dispela samting memba i gimim o kamapim. Yu ken lukim olsem ol projek memba i gimim i save stap tasol long hap ol kisim planti vot long en na tu long ol ples we ol pipel bilong memba i stap long en. Arapela hap ol kendidet bilong salensim



memba i stap long en bai ol i nogat wanpela sevis o developmen liklik.

Olsem na dispela K1.5 milien bai mekim wanem gutpela wok tru?

Nau yet ol memba i save kisim mani long Distrik Sapot Grent, Distrik Rurel Developmen Program (DRIP) em long salt bilong rot na bris samting na arapela Spesol Sapot Grent mani we ol memba i laik mekim sampela wok long ples wantaim. Ol memba yet i gat Diskriseneri na Non Diskriseneri mani long nem bilong ol. Diskriseneri mani i stap mak olsem K250, 000 na Diskriseneri i stap wantaim distrik baset bihainim namba bilong amas pipel i stap insait long dispela hap ilektoret.

Olsem na yumi ken lukim olsem wan wan ilektoret i save kisim moa long K1 milien long olgeta yia tasol dispela mani i save kam hap hap long wan wan nem mi kolim long antap.

Nau yet em Distrik Sapot Grent em K500, 000.

Dispela singaut bilong memba bilong Nuku Andrew Kumbakor long apim dispela K500, 000 i go antap long K1.5 milien em i no nupela toktok. Olpela memba bipo, Sir Pita Lus i bin pairap long palamen i mas apim dispela mani i go antap long K1.5 milien bipo na planti memba i bin wanbel tru. Tasol palamen yet i no bin pasim na nau Mista Kumbakor i laik kirapim gen.

Em i tru olsem i gat sistem na opis i stap pinis long lukim dispela mani i ron long en na go aut long mekim wok long ples. Tasol bikpela pret tasol em olsem dispela wok o projek em bai politikis projek tasol long memba i winim ileksen gen na kam bek long palamen. Ol lain we i sot tru long sevis na developmen bai i no inap kisim kaikai bilong dispela K1.5 milien. Em ol feveret lain o wantok lain tasol bilong memba bai kisim sevis.

Sapos gavman i ken tok olsem makim K1.5 milien bilong wan wan distrik tasol dispela mani bai i go long pasbuk bilong lokol level gavman kaunsel. Orait ol i ken brukim long wan wan wod o kaunsel eria

long dispela ilektoret o distrik bihainim wanem kain projek ol kaunsel i kamapim na i stap long pepa bilong kaunsel opis. Memba i noken siaman long dispela mani. Ol kaunsel i ken mekim pepa long wanem projek ol i laikim long ples bilong ol wan wan orait lokol level gavman kaunsel i ken brukim dispela K1.5 milien i go long ol wan wan.

Dispela em bai yumi ken lukim tru wok na projek i kamap long olgeta ples insait long distrik. Sapos kaunsel i laik bungim na kamapim wanpela bikpela projek we i ken sevim tripela o foapeia ples wantaim orait putim dispela mani i go long en.

Sapos yumi ken tok olsem dispela mani i bilong ol lokol level gavman kaunsel na i no bilong memba, em bai stret tru long mak na rot bilong kamapim sevis na developmen long ples.

Mi ting ol memba bilong palamen i ken yusim gutpela tingting bilong ol olsem lida na stretim gut dispela toktok na mekim i kamap gut long sevim ol pipel. Noken wan wei tasol na votim dispela bil na kisim K1.5 milien nating long traim winim ileksen long 2007.

David - gutpela king, strongpela lida

DAVID i kamap ples klia long taim em i yangpela man yet. Em i bin lukautim sipsip bilong Papa na banisim na lukautim gut sipsip bilong Papa bilong em. Bikpela samting em i laikim tru God na stap klostu tru long God. Em i save singim ol Pres na Wosip Songs na lotu long God. Planti bilong ol song em i bin kamapim i stap long Buk Song tude. Olgeta stori bilong David i stap long 1 Samuel 16 go long 2 Samuel.

Tru em i las bon Pikinini man long famili tasol em i narakain long ol bikpela ol brata bilong em. Em i laikim God na stap klostu wantaim God. Em i man bilong Lotu long God wantaim gutpela song na musik.

Em i lukautim sipsip na save putim was long wel abus no ken kam na bagarapim sipsip bilong papa bilong em. Taim wel abus olsem laion na bikpela weldok ol i kolim bea i laik kaikai ol sipsip wantu David save kirap na pait na kilim ol wel abus indai. Long dispela rot em i kisim trening long husat bihain bai em i kilim



indai wantaim bikpela weldok em bilong em Golaet. Golaet em i olsem weldok i laik daunim ol sipsip bilong God em ol pipel bilong Israel na David kirap i go na kilim em indai.

David i bin kamap long rait taim stret long sevim ol Israel pipel bilong God long han bilong weldok nogut, nem bilong em Golaet. Taim David i kamap Lida, kantri i bin strong moa long ami o difens, wok ikonomi i bin gutpela, na em i bin yunaltim kantri aninit long gutpela Lidasip bilong em. Tude yumi nidim kain Lida olsem David.

1. Man o meri husat i save tru long God na stap pas wantaim God.

2. Man o meri husat lukautim pinis sipsip (kon-

grekesen) na kisim trening na ekspiriens long trupela Lidasip.

3. Man o meri husat bilip long God i ken helpim em long kamapim planti gutpela wok long helpim ol pipel.

4. Man o meri husat i kwaliti Lidasip na wisdom bilong God long laip bilong em.

5. Man o meri husat i lukim visen o klia piksa long wanem samting em i mas mekim long helpim pipel.

6. Man o meri husat i gat bel na tingting long ol pipel na i no em yet.

7. Man o meri husat i stap stret long ai bilong God long ples hait na ples klia wantaim.

8. Man o meri husat i gat bel na laik long lukim pipel i ken muv i go long ples we nau ol i stap long nupela eria o level long edukesen, wok didiman, helt sevises, sosel sevis na tu antap long dispela bai i gat gutpela spiritual developmen.

9. Man o meri husat i pret long ai bilong God oltaim.

10. Man o meri husat i gat bilip long God na bilip long em yet olsem em inap long kamap Lida na mekim gutpela wok.

11. Man o meri husat i gat gutpela spirit na pasin.

12. Man o meri husat i gat pasin bilong tok sori long sin na rong bilong ol.

13. Man o meri husat i save long pasin bilong lotu tru long God wantaim spirit na pasin i tru.

Man i lukim yumi na i save long yumi long ausait, tasol God i lukim yumi na save long yumi long insait. God i laikim bel i klin na pasin we i stret long ai bilong God na man. Sapos yu laik tasim laip bilong arapela manmeri, yu mas larim God i tasim laip bilong yu pastaim. Sapos yu laik lidim arapela manmeri yu mas larim God i lidim yu mas bihainim God yu yet pastaim long ol arapela manmeri i bihainim yu.

God bles yu.

WANTOK

Published Weekly, Wednesday, for Word Publishing Company, Ltd.

P.O. Box 1982, Boroko, NCD

Papua New Guinea

Telephone: 325 2500

Fax: 325 2579

Email: word@global.net.pg

Pe bilong wanpela yia 52 niuspepa

Ples:	Air:
PNG	K140.00
AUSTRALIA	US\$100.00
ASIA PACIFIC na JAPAN	US\$80.00
AMERICA na EUROPE	US\$150.00

General Manager
Justin Hansu Kili

Editor
Neville Choi

Published by Justin Hansu Kili, MBE of Section 58, Allotment 3, Office 2, Waigani Drive.

Word Publishing Company Limited is owned by the four major churches of Papua New Guinea: Catholics 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.



BUNGIM OL WOA VETEREN: Prinses Anne i toktok wantaim Presiden bilong PNG Woa Veterens Lig, Ben Moide husat i gat 84 krismas na ol narapela poroman bilong em long Bomana Woa matmat seremoni bung.



REDI LONG BUNGIM PRINSES: Ol Boi Skaut i redi long welkamim Prinses Anne long Bomana Woa matmat



PUTIM HANMAK LONG OPIM HAUS: Prinses Anne i bin opim nupela Enid Curtain Haus bilong ol singel meri taim em bin raun lukim ol disebel long Cheshire Homs long Hohola. Prinses i save sapatim ol Sariti na trangu ogenais-esen.

RAUN BILONG BILONG MI

Veronica Hatutasi i raitim

WANEM hap em i go long em, bikpela lain manmeri na pikinini i bin bihainim em.

Tru tumas, wanpela de raun bilong Prinses Anne, pikinini meri bilong Kwin na hetmeri bilong Komonwel we PNG i memba long em, i bin go gut tasol wantaim nogat meknais.

Ol skul sumatin, ol pikinini na publik long Pot Mosbi i bin sanap lainim ol rot na wevim ol liklik PNG na Britis flek long welkamim na tok gutbai long em.

PNG Ivens Kaunsel, polis, PNG Difens fos, gavman na ol ples we Prinses Anne i raun long en i bin mekim bikpela wok long redim ples olsem wokabaut bai go gut na wankain tu long sefti na sekyuriti bilong em. Prinses i bin pundaun long Jackson's ples balus long Pot Mosbi las wik Trinde apinun 5 kilok we planti tausen pipel i bin welkamim em. Wankain tu taim em i go bek long Fonde apinun 4 kilok.

Planti bikpela manmeri na ol skul pikinini i tok em bin sans bilong ol long lukim wanpela memba bilong Royel Famili i kam. Olsem na ol i bin wet long ol ples em i go long en, sanap long ol sait rot long lukim em,

"Em i wanpela long ol laip taim sans na mipela i mas lukim wanpela Royel Famili memba taim em i raun i kam long kantri. Ol pikinini i stap tu long skul maloio na mipela i wok long raun i go long olgeta hap em i go long em, stat long Bomana Woa matmat,

inap nau long ples balus mipela i kam long tok gutbai long en.

"Mi bin abrus long lukim mama bilong em, Kwin, taim em bin kam bipo. Ol pikinini bai i gat planti stor long lukim em. Mipela i kisim ol pot tu long dispela," Philip Huhume, em namba wan pikinini bilong Susar Kariko Huhume i bin droim fleg bilong PNG i tok.

"Prinses em i naispela meri na o taim, wok na mani i bin go long redim wokabaut bilong em inapim tru samting we mipela i wokhat long em. Mipela i amamas long lukim ol samting i go gut, planti manmeri na pikinini i bihainim lukim na welkamim em.

"Em i gutpela long gat memba bilong Royel Famili i kam bikos dispela i mekim PNG i pilim olsem em hap bilong Komonwel na i hap bilong bikpela famili bilong ol nesen," wanpela woklain bilong PNG Ivens Kaunsel i tok.

Theresa Ososo i wok wantaim Ais Niugini Keitering sevis long Jackson's ples balus i tok: "Mi amamas tru long lukim Prinses Anne na redim kaikai we em bai kaikai long em long balus. Mi wanpela meri tasol i bin stap long grup bilong redim kaikai bilong Prinses," Theresa Ososo i tok.

Kiwi Api i wok wantaim PNG Airlines i bin wok olsem gaun kontro sekyuriti i tok em i amamas gen long lukim wanpela memba bilong Royel famili bihain long em i lukim liklik brata bilong Prinses Anne em Prins Edward husat i bin kam long PNG long 1991.



KATIM RIBEN: Prinses Anne opim nupela laibreri bilong ol meri long Koki Dvelopmen senta, projek bilong Dame Carol Kidu.

GUTBAI PRINSES SIS KAM

Siaman bilong PNG Ivens Kaunsil na Inta Gavman Rilesens na Bogenvil Afeas Minista

Sir Peter Barter i tok em i amamas long gutpela sapot bilong pablik long wokabaut bilong Prinses Anne tasol wanpela eria em long protocol sait we i no bin gutpela tumas.

"Olgeta samting i bin go gut na mi amamas. Gavman na kantri i bin mekim gutpela wok redi na ol pipel i bin givim gutpela welkam long olgeta hap em i raun long em. Wanpela samting tasol em Protokol. Mipela i mas wok gut long dispela eria na kirapim wanpela sistem long lukautim dispela eria na putim ol rait pipel long eria ya. Na long ol samting i kamap bihain, na ol bai stat na pinis long taim stret.

"Prinses i bin laik save moa na lukim na toktok wantaim ol pipel long ol hap em bin go long en. Em bin gat trupela intres long HIV/AIDS, Women na Vailens na infomol sekta. Em bin gat Aiwara long ai bilong em taim em i lukiuk raun long sampela ol ples ya.

"I gutpela long wokabaut na bikpela luksave Prinses Anne i putim long wok bilong HIV/AIDS hia i putim strongpela tingting na sapot bilong ol lida na pipel long mekim samting na daunim sik ya. Em i gat bikpela ekspirians na save long HIV/AIDS bikos long samting i kamap long Afrika. Bikpela meri olsem i ken sapotim strong na skruim mesej long sotpela taim em i bikpela samting. Prinses i bin givim luksave na tok amamas long Angliken Sios i kirapim Anglikea we i mekim bikpela wok

long daunim sik AIDS long PNG," Sir Peter i tok.

Long Bomana Woa matmat ausait long Mosbi siti, Prinses Anne i bin putim ritflawa long tingim ol dai soldia bilong 2. Planti manmeri na ol skul sumatin bilong Marianville Katolik Sekonderi skul bilong ol meri, De La Salle Bois Hai skul na Bomana Praimeri i bin givim gutpela welkam long em.

Long Sheshire Homs, Prinses Anne i bin opim hostel bilong ol singel meri. Em bin go long Famili Sapot Senta we ol mama na meri i gat hevi long man i painim na rausim ol i save go long em. Long Koki Dvelopmen senta, em bin opim laibreri na risos senta bilong ol meri, lukim Infomol Sekta na wanem ol meri i wokim na tu, lukim ol Elementeri skul pikinini husat i bin mekim em i amamas wantaim ol naispela singsing na bilas bilong ol. Bihain, em bin go long Palamen long givim ol luksave Logohu medol long ol pipel husat i givim gutpela sevis long pipel, komyuniti na kantri.

"Prinses Anne i laikim stret wokabaut bilong em, gutpela pasin pren na amamas pipel i soim long em. Dispela i namba tu taim Prinses i kam na em i lukim bikpela senis i kamap long Mosbi na kantri insait long 31 krismas long 1974 em bin kam pas-taim bipo long kantri i kism indipendens long 1974," Ailsa Anderson, pres opisa bilong em i tok.

Yu ken lukim wokabaut bilong Prinses Anne long ol piksa bilong Nicky Bernard kism las wik Fonde.



GUTBAI PNG: Raun long PNG i pinis na em i taim long tok gutbai. Bipo em i go insait long balus, Prinses Anne i tromoim han long fewelim PNG taim man bilong em, Etmirel Laurence i lukluk i stap.



PRINSES I KAM: Ol Pri skul pikinini bilong Koki Dvelopmen i wetim kamap bilong Prinses Anne.



BILAS LONG LUKIM PRINSES: Liklik Daniel bilong Manus na Lyn bilong Musau, Nu Ailan i skul long Koki Dvelopmen Senta Pri skul i bilas gut stret na welkamim Prinses taim em i go long skul bilong ol.



GUTBAI PRINSES: Ol skul sumatin bilong Sen Peter's Erima i lain long Jackson's ples balus na wevim fleg bilong Ingran na PNG long tok gutbai long Prinses Anne.

Cyclone Studios halivim long sanapim sios

Neville Choi i raitim

WANPELA lokol rekoding studio i bin mekim bikipela wok tru long halivim long bungim mani bilong sanapim wanpela sios long Bogenvil.

Cyclone Studios, ol lain husat i bin rekodim albam bilong tupela brata bilong Lahir long Nu Ailan, Twin Hoks of Kavieng, i bin pilaim musik bilong tupela brata long namba wantaim long wanpela musik konset i no long taim i go pinis.

As tingting bilong Cyclone long mekim dispela musik konset we ol i bin soim ol musik atis bilong ol em long bungim mani bilong sanapim Torokina Katolik Sios long Bogenvil.

Konset we i bin kamap long Spots In long Mosbi yet i lukim moa long 2000 manmeri i bin kamap.

Cyclone i bin lonsim ol nupela musik atis na grup bilong ol olsem Laerams of Kagua, Twin Hoks, ABGs bilong Nu Ailan tu. Ol arapela ben husat i bin pilai long dispela konset em Crew 5 na Niu Age Ben.

I bin i gat ol lain masol man bilong Sauten Hailans i soim stail bilong ol long dispela nait.

Bosman bilong Cyclone Studios, Tarcissius Muganaua na famili bilong em i bin go pas long dispela musik konset wantaim halivim bilong Tsiamalili Famili.

Wanpela bikipela samting i kamap long dispela lonsing em brata bilong tupela manki Lahir, Twin Hoks i bin kam long givim luksave long musik bilong ol.

Thomas Wol i bin kamap na singsing bihainim nek bilong tupela brata bilong em taim ben bilong Cyclone Studios i pilaim ol singsing bilong ol.

Ol singsing bilong Twin Hoks i bin pairap bikipela tru na planti manmeri i kamap i bin askim long musik bilong ol.

Ol arapela lain husat i bin halivim long mekim dispela musik konset i kamap em biknem redio man Kas-T husat i bin go pas long konset olsem Masta ov seremoni, Moses Rake bilong ples Tinputz husat i bin givim ol musik instramen bilong em fri ov sas bilong konset.

Ol musik albam bilong Cyclone we ol i bin lonsim em Henry Ono o Imbokeri bilong Sauten Hailans, na Twin Hoks yet.

Franco Palin na Niu Age Ben i bin stap long kirapim skin bilong ol manmeri na ol yangpela bilong Cyclone Studios yet, Emmanuel Muganaua (kibot), Nigel Muganaua (drams), Jimmy Piriri (kibot) Joshua Pomaloh na man husat i bin go pas long stretim olgeta ben, Clelland Tukana.



SOIM KALA: Liklik brata bilong Emmanuel, Nigel Muganaua i bin soim kala bilong em olsem wanpela fit drama.



BRATA BILONG TWIN HOKS: Thomas Wol, brata bilong Tony Wol husat i go pas long Twin Hoks Ben i bin stap long lonsing bilong albam bilong ol.



NOGUT O: Stail manki Henry Ono we planti manmeri i save long nem bilong em olsem Imbokeri i bin lonsim albam bilong em tu.



TOKSAVE:
Glasim Musik wantaim JK bai kambek neks wik..



NIU AGE: Ol stail manki bilong Niu Age Ben i bin seksekim lek bilong ol manmeri.

Ol manki Aiyau rausim namba wan albam

Paulias Tali i raitim

OL MANKI bilong ples Aiyau long Siassi Ailan long Morobe husat i stap long Kimbe, Wes Nu Briten i rausim pinis namba wan albam bilong ol aninit long Palm Studios long Kimbe.

Bipo ol dispela manki i save pilai string ben raun long ples Siassi, na Kilenge long Kep Glosta.

Ol i bin kolim ol yet Akoni String ben long 1994. Tasol bihain ol boi yet i bin pasim tok long kamapim wanpela laip ben. Em nau ol i mekim i go inap ol i

kamap long Kimbe na rekod tru long hap.

Sapos yu harim planti singsing bilong ol bai yu yet inap tingting i go bek long ples.

Ol ben membas yet i tok bikipela tenkyu long God Papa, long lukautim ol taim ol i bin stap long Siassi, long Kimbe, na taim ol i go rekodim albam bilong ol.

Planti long ol manki em ol hap kas Siassi na ples Kilenge.

Ol singsing olsem E. Balungo na narapela olsem Masin so o ol boi Kilenge i katim timba, yu inap tingim bipo taim ol lain tumbuna i bin wok long Masin So.

Sia Lume i bihainim bit bilong singsing Kai, Yor Ganimo.

Ol i tok tenkyu tu long Saun Enjinia bilong Palm Studio Kimbe, John Kila long musik i bin kam gut tru.

Ol i no ting lus long singsing yu ken harim ol i kolim Ale Taekia, long tingim brata bilong ol Jack Mulinge, husat i bin lusim laip bilong em las yia.

Ol ben membas em Toni M Nakumara (komposa, lit gita), Otto D Tavuukang (bekap singsing), Peter Suvan (bekap) na Sonny Dinas (Bes Gita).



TWIN HOKS DAIHAT: Ya ya Wip! Man, dispela yangpela i no isi long givim danis long musik bilong Twin Hoks.

CLIPPA: NICKY BERNARD

EM TV TV GAID

THURSDAY, 6th OCTOBER 2005

5.29AM STATION OPEN
5.30AM G JOYCE MEYER
6.00AM G TODAY
9.00AM G CREFFLO DOLLAR CLASSROOM BROADCAST

5.30AM G JOYCE MEYER
6.00AM G TODAY
9.00AM G CREFFLO DOLLAR CLASSROOM BROADCAST

FRIDAY, 7th OCTOBER 2005

5.29AM STATION OPEN
5.30AM G JOYCE MEYER
6.00AM G TODAY
9.00AM G CREFFLO DOLLAR CLASSROOM BROADCAST

TUESDAY, 11th OCTOBER 2005

5.29AM STATION OPEN
5.30AM G JOYCE MEYER
9.00AM G CREFFLO DOLLAR CLASSROOM BROADCAST

SATURDAY, 8th OCTOBER 2005

8.00AM G PLANET FANTA
9.30AM G GOODSPORTS
10.00AM PG SO FRESH
11.30AM G JAPAN VIDEO TOPICS

WEDNESDAY, 12th OCTOBER 2005

5.29AM STATION OPEN
5.30AM G JOYCE MEYER
6.00AM G TODAY
9.00AM G CREFFLO DOLLAR CLASSROOM BROADCAST

SUNDAY, 9th OCTOBER 2005

7.28AM **STATION OPEN**
7.27AM G EMTV TOK SAVE
7.30AM G BUSINESS SUCCESS
8.00AM G BUSINESS SUNDAY

MONDAY, 10th OCTOBER 2005

5.27AM STATION OPEN
5.30AM G JOYCE MEYER
6.00AM G TODAY
9.00AM G CREFFLO DOLLAR CLASSROOM BROADCAST



Raun wantaim Kanage olgeta wik



YUMI FM NATIONAL WEEKLY HITPARADE Oktoha 8, 2005

Table with 3 columns: Singing, Musik Atis, and Dispela Wik. Lists songs and artists like Maten Kandiek, Queen 4 Lane, Ngoe Oe Nel, etc.

CATHOLIC RADIO 103.5 FM

Table with 2 columns: Time slots and Program names. Lists programs like ANGELUS, MEDITATION/INSPIRATIONAL MUSIC, VATICAN RADIO WORLD NEWS, etc.



Laikim Penpren

Nem: Esabel Maywu
Krismas: 16 (meri)

Adres: Ramu Sugar Limited, PO Box 2183, Lae, Morobe Province
Save laikim: Pilai spot, raitim pas, tok pilai na senisim poto na presen.

Nem: Leon I. Philip

Krismas: 17 (man)

Adres: PO Box 397, Eriku, Morobe Province
Save laikim: Stadi, harim ol gospel musik, go painim abus long wara wantaim ol pren.

Nem: Jonah Kaguya

Krismas: 19 (man)

Adres: PO Box 1289, Goroka, Eastern Highlands Province
Save laikim: Pilai ragbi, musik, lotu, mekim pren, raitim pas na planti moa.

Nem: Samson Irvaben

Krismas: 19 (man)

Adres: Kambubu Secondary School, PO Box 421, Kokopo, East New Britain Province
Save laikim: Go lotu, tok pilai, raitim pas na pilai spot.

Nem: Elizabeth Pondros

Krismas: 15 (meri)

Adres: Mercy Secondary School, PO Box 580, Wewak, East Sepik Province
Save laikim: Ritim buk, raitim pas, kuk, singsing, danis na soping.

Nem: Jack Hale

Krismas: 16 (man)

Adres: Kumin Primary School, PO Box 69, Mendi, Southern Highlands Province
Save laikim: Pilai spot, go huk long wara, go lotu na raitim pas.

Nem: Iksii Siviling

Krismas: 22 (man)

Adres: C/ Mt Zion Congregation, PO Box 3512, Boroko, NCD
Save laikim: Go lotu, pilai soka, mekim penpren, wokim gaden na raun lukim ples.

Nem: Rodney A. Smith

Krismas: 17 (man)

Adres: C/- Jonah Ayawo, Kambubu Adventist School, PO Box 421, Kokopo, ENBP.
Save laikim: Pilai soka, wok long fam, go long lotu, harim gospel musik na pilai musik.

Nem: Kesty Andoga

Krismas: 20 (meri)

Adres: Sangara Vocational Centre, PO Box 120, Popondetta, Oro Province
Save laikim: Pilai basketbol, harim musik, raun long apinun senisim presen na poto.

Nem: Rosita Hanson

Krismas: 16 (meri)

Adres: Sangara Vocational Centre, PO Box 120, Popondetta, Oro Province
Save laikim: Raitim pas, go lotu, harim musik, kuk, tok pilai, pilai spot, kaikai buai na senisim poto na presen.

Nem: Gloria Fehihawa

Krismas: 17 (meri)

Adres: Mercy Secondary School, PO Box 580, Wewak, East Sepik Province
Save laikim: Pilai volibol, gita na singsing.



STORI TUMBUNA

BIPO tru i gat planti man i stap long wanpela ples. Nem bilong dispela ples em Luwi. Ol i gat samting bilong kaikai tasol taim bilong pait ol i nogat bunara.

Man, ol birua i kam pinisim ol dispela manmeri bilong Luwi. Wanpela man na wanpela meri tasol i stap long Luwi. Olgeta manmeri i pinis tru na tupela tasol i stap. Wanpela mun samting i pinis, man i tingting planti: "mi mas mekim wanem long kilim ol birua?"

Dispela taim yet man i tokim meri bilong em, "yumi tupela i mas kilim pik na kaikai pastaim." Tupela i kilim pik na kaikai pinis. Man i tokim meri: "Yu mas i stap long ples."

Meri i tok: "Yes, mi inap stap."

Man i redim olgeta bilas na em i mekim olsem na go long Kutubu. Tupela nait em i slip long bus. Long namba tri nait long en, em i go antap long maunten Kesu. Man ya em i stap long dispela maunten na em i tingting planti.

Em i stap liklik taim tasol na em i harim wanpela pairap. Em i lusim maunten na em i go klostu long haus man bilong Kutubu. Insait long haus man i pairap yet na bel bilong man ya i amamas tru. Olgeta manmeri i slip pinis, em i go insait na painim dispela samting. Em i kisim dispela samting na em i go.

Watpo klaut i pairap?



Em i lukim samting, man, i Kutubu na em i kamap long nais tru. Em bunara. Em i lusim ples Luwi. Man, dispela taim

yet ol birua bilong em i pinis tru. Nem bilong man em Kepi.

Kepi i pinisim dispela olgeta man. Tasol planti man i stap yet. Dispela taim em i laik kilim pik. Em i salim tok i go long olgeta pren bilong em. Taim nating tu, bunara bilong em i pairap i go yet. Planti man i mangalim bunara bilong Kepi. Wan mun pinis em i kilim 81 pik.

Dispela taim nem bilong em i go antap tru. Man, planti manmeri i kam kaikai pik, em i kilim long en. Em i mumu pinis, orait em i stori pinis, em i rausim pik. Bihain em i skelim olgeta pik i go long ol pren bilong em. Ol i kaikai pik pinis, olgeta manmeri i go nabaut long ples bilong ol.

Kepi i laik bungim ol pik insait, na i go kisim pik. Man, dispela taim em i lukim wanpela liklik boi. "Papamama bilong yu we?" Boi i tok: "Ol i lusim mi, na ol i go pinis."

Kepi i tok: "Orait, yu kam mipela i slip."

Tupela i slip na liklik boi i kisim bunara. Na wanpela samting i kisim em i go antap long klaut. Olsem na dispela bunara i save pairap oitaim.

Sapos boi ya i no mekim olsem, klaut i no inap pairap. Em boi pairap long graun tasol.

Stori i kam long Sauten Hailans provins

Mi gat wari na mi laikim helpim

Dia Laiplain

Mi winim 19 krismas pinis na inap long tripela yia nau, mi gat wanpela gelpren. Mi bin lusim planti mani long dispela meri long wanem, mi ting bai wanpela de, mitupela i marit. Tasol nau, mi painaut olsem em i laikim narapela man. Inap mi ken askim papamama bilong em long bekim ol mani bilong mi we mi bin tromoim pinis long em?

FRIENDSHIP BLUES

Dia pren

Mi no klia long dispela mani we yu bin lusim long gelpren bilong yu. Sapos em mani we yu bin givim papamama bilong meri olsem hap brait prais o hap pe bilong meri yet, orait, ol i



mas bekim long yu.

Tasol sapos em i mani yu bin baim presen long dispela meri, baim gutpela kaikai o yusm long raun bilong yutupela yet, yu no inap long askim bai ol i bekim dispela mani.

Ol dispela kain presen na bilas samting wanpela boi i givim long prenmeri bilong em, em i mak bilong soim olsem tupela i pren. Boi i amamas long stap wantaim meri na em yet i gutpela bekim bilong dispela pe o presen bilong em.

Pren, bel bilong yu i

nogut long wanem meri ya i lusim yu na i painim narapela man. Tasol yu lukim nau, yutupela wantaim i yangpela tru taim yutupela i stat long wokabaut wantaim na wokim pre pasin. Yu noken ting wanpela yangpela meri olsem i ken save em i laik maritim yu o nogat.

Ating em i namba wan taim em i gat boipren na olsem, em i no save gut long ol dispela samting.

Ating meri tu bin amamas wantaim yu na i laikim yu tu long dispela tripela yia we yutupela i bin stap wantaim.

Tasol bihain, em bin save gut long yu em bin pilim olsem em i no laik maritim yu. Na long sait bilong yu, ating yu no mas kain man

we em i laik maritim yu. Na long sait bilong yu, em i no mas kain meri we yu mas maritim. Em i no pas long yu. Tasol em i moabeta long yu i maritim meri husat bai laikim yu stet.

Sapos yu gat wari o hevi, rait i kam long Lifeline, P O Box 6047, Boroko, NCD. Yu ken ringim mipela tu long telipon namba 3260011.

Raitim trupela nem na etres bilong yu i kam na bai mipela i salim bekim long pas bilong yu. Mipela bai toktok long ol trupela samting yu askim long em tasol bai mipela i no inap long putim trupela nem bilong yu.

Laiplain



Bisnis bilong Groim Diwai insait long PNG - Planim diwai long ol renfores eria

Rot bilong groim ol spisis diwai i save groa insait long PNG

Ceiba pentandra kapok, white silk cotton tree

Nem bilong en: kapok, wait silk koton tri

Ples we em i save groa: Ol wel diwai kapok i save gro long tropikel Amerika na Afrika. Em i bin kamap long ol arapela kantri olsem Esia bipo tru na nau em i gro long olgeta hap bilong Esia na ol Pasifik kantri.

Wanem kain diwai: Wanpela diwai bilong gro hariap na i gat bikpela stretpela namel bilong em. Sampela taim em i save groim ol han i sut i go aut long namel bilong em. Ol han diwai bilong em i save gro i go aut tasol. Ol plaua bilong em i save wait na longpela bilong ol inap long 3 sentimita. Ol i save kamap long stat bilong taim bilong drai taim ol diwai i nogat lip. Prut bilong em i 7.5 i go inap long 30 cm. Taim em i mau, em i save tanim braun.

Rot bilong yusim: Ol karamap bilong sid o pikinini i gat kapok insait long en. We yu ken yusim olsem insalesen o putim insait



long ol arapela samting bilong holim hot na kol bilong samting. Long ples Java, ol i save kaikaim ol yangpela prut. Bipo kapok em ol i save yusim insait long ol pilo. Long namba tu Woi Woa ol i yusim insait long ol klos. Nau ol i save yusim wantaim ol arapela kain rop bilong makim ol klos samting.

Wok Neseri: Yu ken groim long kain kain hap, tasol em i save gro gut moa aninit long 500 mita na long ples i gat moa long 1000 milimita ren olgeta yia. Em i save karim plaua na prut long taim bilong drai, tasol prut bai no inap kamap sapos mak bilong kol i stap aninit long 20 digris sentigred. Yu ken groim ol diwai long ol hap fian bilong diwai na yu inap long kisim inap kapok namel long namba 4 na namba 5 yia.



McCARTHY & ASSOCIATES (FORESTRY) PTY. LTD. National & International Forest Consultants mcca@datec.net.pg

"Long kisim tok stia long olgeta wok diwai"

Rikarika Kopretiv winim namba wan intanesenel kopi resis

James Kila i raitim

OL LAIN memba bilong Rikarika Kopi Koperativ insait long Kuru mauntan eria long Henganofi distrik long lsten Hailans provins i bin kamap nambawan bihain long ol jas insait long "Pride of PNG" intanesenel kopi kap teisting kompetisen long Goroka i tok kopi bilong ol i namba wan tru.

Dispela intanesenel resis long Goroka em namba wan resis insait long PNG na Esia-Pasifik rijon na i lukim ol intanesenel lain bilong teistim kopi i bin kamap long Goroka long dispela resis. Ol lain jas bilong dispela resis i bin kam long Itali, Netherlands, USA, Australia na Niu Silan.

Het jas bilong dispela kopi kap resis, Willem Boot i bin kolim Rikarika kopretiv sosaiti husat i bin winim nambawan ples na olgeta famas

husat i bin bung insait long empitieta bilong Yunivesiti ov Goroka i bin singaut na amamas na paitim han.

Mista Boot i tokaut tu long ol nem bilong ol narapela lain husat i bin givim kopi bilong ol long dispela resis.

Nambawan em Rikarika, namba-tu ples em Stat kopi kopretiv bilong Obura, namba-tri ples em Jaguimento bilong Kesavaka long Henganofi distrik, namba-4 ples em Nogemu kopretiv bilong Fayantina long Henganofi distrik, namba-5 em Bungim-Han kopretiv long Fayantina long Henganofi, namba 6 ples em Jaguimento gen, namba-7 em Hogote kopretiv bilong Okapa distrik, namba 8 em Jaiyobi bilong Benas na namba-9 em Ke'efu kopretiv bilong Okapa distrik.

Boot wantaim ol narapela ovasis jas i givim

bikpela tok amamas long Coffee Pacifica na PNG Kopi Groas Federesen long kamapim dispela bikpela resis insait long PNG na bringim ol intanesenel jas i kam long skelim kopi bilong kantri.

Boot i tokaut olsem ol i bin kisim planti ol kopi olsem sempol bilong dispela kap resis.

Em i tok olsem long namba wan taim tru ol jas i bin kisim moa long 200 ol sempol bilong kopi we i bin kam long ol smolholda famas. Dispela ol lain famas em memba bilong ol kopretiv grup husat i memba wantaim PNG Kopi Groas Federesen. Ol dispela lain smolholda famas i kam long lsten Hailans, Westen Hailans na Morobe.

Boot i tok olsem bihain long ol i kisim 200 ol kopi sempol o i glasim i go na makim 35-pela sempol tasol. Bihain long dispela ol i

glasim gen i go na kamap wantaim 15-pela sempol.

Long fainol bilong resis long Fraide ol jas i sindaun na glasim na skelim i go na kamap wantaim 9-pela husat i go insait long fainol.


"Ol dispela intanesinol jas i pilim PNG kopi i ron insait long ol rop long skin bilong ol," Boot i tok.

Em i tok olsem bikpela samting em olgeta lain husat i givim kopi bilong ol long stap insait long resis i no lus. Olgeta i win long stap insait long dispela kompetisen.

Sif Eksekutiv bilong Coffee Pacifica, Shailen Singh i tokaut olsem ol dispela 9-pela lain husat kopi bilong ol i stap insait long fainol bilong resis bai makim PNG insait long intanesinol Spesialti Kopi So we bai kamap long Not Karolaina long America long neks yia.



KAM SKELIM STRONG: Ol intanesenel kopi teista husat i kam long ol arapela bikpela kantri i bin stap long skelim strong bilong PNG kopi long Goroka.



Cat® 428D Backhoe Loader

Raising the standards for performance, versatility operator comfort.

More than a machine. A Partner.

The 428D benefits from increased hydraulic performance and operator comfort, whilst maintaining the high levels of visibility, durability and reliability that Caterpillar Backhoe Loaders have long established in the industry.

- **Engine and Hydraulics** - The Caterpillar® 3054 turbocharged engine is designed for strength, performance and versatility. The load sensing, closed centre hydraulics system provides power where you need it, when you need it.
- **Operator Station** - Style, comfort, superb visibility and ease of operation maximise operator comfort and productivity.
- **Serviceability** - Excellent access and fewer maintenance requirements add up to unparalleled ease of service.

Hastings Deering



PORT MORESBY Phone: 300 8300 Fax: 325 0141

LAE Phone: 472 2355 Fax: 472 1477

TABUBIL Phone: 548 9045 Fax: 548 9155

RABAUL Phone: 982 1244 Fax: 982 1129



PACIFIC BEAT

Singirok autim tingting long sekyuriti bilong Australia

BIPO difens komanda bilong Papua Niugini i tok olsem namba tu bom pairap long ol turis ples long Bali ailan long Indonesia i soim klia ol bikpela sekyuriti hevi insait long PNG. Meja Jenerel Jerry Singirok i tok PNG i ken kamap wanpela ples we ol lain teroris i ken yusim long makim ol kantri olsem Australia, o ol Australia manmeri i stap insait long PNG.

Husat i askim: Steve Marshall
Husat i bekim: Meja Jenerel Jerry Singirok, Bipo PNG Difens Komanda.

SINGIROK: Mipela i no wanpela sekyuriti hevi. Papua Niugini i no wanpela sekyuriti hevi long Australia long wanem, olsem, em i no wanpela gutpela tingting na i nogat as long dispela tingting olsem mipela wanpela sekyuriti hevi bilong Australia. Tasol sapos Australia i no wok strong na kisim Papua Niugini long menesim, na wok bung long ol sekyuriti samting, em i ken kamap hevi we ol teroris i ken yusim Papua Niugini olsem ples bilong bagarapim Australia.

MARSHALL: Em bai isi bilong wanpela teroris sel long stap wok insait long Papua Niugini?

SINGIROK: Olgeta samting i stap bilong ol teroris o kriminel, ol intanesenel kriminel long wok long PNG long wanem mipela i nogat gutpela sekyuriti na sefti netwok olsem ol arapela kantri. Tru tumas, gavman i no lukluk strong long sekyuriti menesmen.

MARSHALL: Inap yu tok klia moa long ol rot we ol teroris i ken kam na wok insait long PNG?

SINGIROK: Em i isi tru long hait na wok hia insait long PNG, o yusim olsem wanpela ples bilong bungim olgeta save bilong ol. Ol i ken yusim ol as ples long helpim ol, ol i ken yusim bikpela hap graun insait long kantri long mekim trening bilong ol. Em i isi tru. Gavman i no save wok strong agensim ol pipel bilong ol arapela kantri. I nogat gutpela sekap rot. I nogat bikpela mekimsave na ol

stet institusen o opis i no save wok strong long sekim ol lain manmeri bilong arapela kantri i stap long hia.

MARSHALL: Sapos nogat wok i kamap long daunim o banis agensim dispela kain hevi, yu ting wanem samting bai kamap insait long narapela 20 krismas?

SINGIROK: Mi tok olsem sapos mipela i no tingting strong long sekyuriti menesmen na i nogat sefti o sekyuriti netwok, em nau insait long 20 krismas antap, namba wan samting em ol bikpela wok kamap na samting bilong kantri bai bagarap, ol wok bisnis bilong mipela, pipel bilong mipela na long wankain taim planti Papua Niugini manmeri bai paul long wanek ol samting i no stret bilong ol long wok insait long pasin teroris.

MARSHALL: Mista Singirok, bai dispela hevi i mas i gat wanem kain wok banis?

SINGIROK: Olsem mi tok pinis, sapos yumi laik banis agensim ol teroris long wol na rijinel level, em nau ol kantri olsem Australia husat i wok long go pas long netwok, tren wantaim ol Pasifik kantri olsem Papua Niugini bai mipela i ken banis agensim ol teroris. Dispela wok i mas kamap. Tasol mipela olgeta i mas yusim wankain pawa na strong. Wankain komyunikesen.

MARSHALL: Ol Australia manmeri i stap insait long Papua Niugini. Ol dispela lain i ken kisim bagarap tu?

SINGIROK: Yes, Wanpela rot we ol teroris i ken bihainim em sapos ol i no inap long go insait long Australia, ol bai bagarapim wanem ol ples Australia i stap long en. I no Papua Niugini tasol. I ken kamap long Fiji, long Vanuatu, na wanem Pasifik o Maikronesia kantri long wanem em ol dispela hap we Australia i wok long wok strong long en.

Sapos ol i no inap long bagarapim Australia we ol i stap, bai ol i traim ovasis olsem ol i mekim long Bali long 2003.

PASIFIK NA WOL NIUS

Autonomous gavman i opim Panguna main

Long Papua New Guinea, Autonomous gavman long Bogenvil i bin kamapim namba wan gutpela tingting bilong em long opim gen Panguna main, husat i bin kamapim planti trabel long en pinis. Otonomes Bogenvil Gavman i bin vout 38-2 sapatim tingting bilong opim gen main, em ol i bin pasim long taim ol trabel i bin stat long 1989. Ol i kirapim pinis wanpela komiti long kisim tingting blong ol as-ples papa graun, wok wantaim nesene gavman na paitim toktok wantaim papa bilong main, Bogenvil Kopa Limited. Taim sampela long ol intanesenel maining kampani ol i bilip i no soim laik long i go bek long ailan, ol eksekutiv bilong dispela Australia na Canada maining kampani ol i tok i bin mekim lukluk bilong ol pinis i go long Bogenvil.

Vanuatu President askim long ol i glasim gut gen mama lo

PRESIDEN bilong Vanuatu i yusim 26th Anivesari long Saining bilong Mama Lo bilong kantri long tokaut gen long ol i lukluk gut ken long mama lo o konstitusen. Long toktok bilong em long wanpela seremoni long Constitutional Place long Port Vila, President Kalkot Mataskelekele i bin tok, bihain long moa long tupela ten yar, em i taim bilong glasim gut gen Konstitusen bilong strongim ekonomi, sosol na politiks i go long ol pipel. Ol tingting na laik bilong Komiti i stap yet long palamen na em i no mekim samting long en yet.

RADIO TOK PISIN PROGRAM
TUNE IN: 101.9 FM
 Radio Australia Tok Pisin Program - stat long mun Mas 2005

MANDE Moring	6AM Stesen Op - Nius Hetlain - Musik na ol intaviu
6.30AM Nius na Karent Afes	7AM Stesen Pas
Nait	7PM Stesen Op
7.01PM Ol Hetlain na Program Priviu	7.15PM Musik na Chit-Chat
7.30PM Nius na Karen Afes	8PM Helt
8.15PM Musik	8.30PM NIUS
8.40PM Spots Riplei	8.55PM Musik
9PM Stesen Pas	
TUNDE Moring	6AM Stesen Op - Nius Hetlain - Musik na ol intaviu
6.30AM Nius na Karent Afes	7AM Stesen Pas
Nait	7PM Stesen Op
7.01PM Ol Hetlain na Program Priviu	7.15PM Musik na Chit-Chat
7.30PM Nius na Karen Afes	8PM Focus Musik/Spots
8.15PM NIUS	8.30PM Helt Riplei
8.40PM Musik	8.55PM Stesen Pas
9PM	
TRINDE Moring	6AM Stesen Op - Nius Hetlain - Musik na ol intaviu
6.30AM Nius na Karent Afes	7AM Stesen Pas
Nait	7PM Stesen Op
7.01PM Ol Hetlain na Program Priviu	7.15PM Musik na Chit-Chat
7.30PM Nius na Karen Afes	8PM Focus Musik/Spots
8.15PM NIUS	8.30PM Helt Riplei
8.40PM Musik	8.55PM Stesen Pas
9PM	
FONDE Moring	6AM Stesen Op - Nius Hetlain - Musik na ol intaviu
6.30AM Nius na Karent Afes	7AM Stesen Pas
Nait	7PM Stesen Op
7.01PM Ol Hetlain na Program Priviu	7.15PM Musik na Chit-Chat
7.30PM Nius na Karen Afes	8PM Youth Musik/Spots
8.15PM NIUS	8.30PM Focus Riplei
8.40PM Musik	8.55PM Stesen Pas
9PM	
FRAIDE Moring	6AM Stesen Op - Nius Hetlain - Musik na ol intaviu
6.30AM Nius na Karent Afes	7AM Stesen Pas
Nait	7PM Stesen Op
7.01PM Ol Hetlain na Program Priviu	7.15PM Musik na Chit-Chat
7.30PM Nius na Karen Afes	8PM Wantok
8.15PM Musik	8.30PM NIUS
8.40PM Youth Riplei	8.55PM Musik
9PM Stesen Pas	
SARERE	Nait
7PM Stesen op - Ol Nius Hetlain/Program Priviu	7.05PM Musik na Chit Chat
7.30PM Nius	7.40PM Wantok
8PM Lokal Ben	8.30PM Nius
8.40PM Musik/Chit Chat	9PM Stesen Pas
SANDE	Nait
7PM Stesen op - Ol Nius Hetlain/Program Priviu	7.05PM Musik na Chit Chat
7.30PM Nius	7.40PM Famil Blong Serah (Radio Plei)
8PM Lukluk Bek Long Wik	8.30PM Nius
8.40PM Musik/Chit Chat	9PM Stesen Pas

TOKSAVE: YU KEN HARIM RADIO AUSTRALIA TOK INGLIS LONG 24 AUA 7 DE LONG WAN WIJK

Pacific BEAT

Listen to Radio Australia 101.9FM Port Moresby

4, 5, 6am & 4pm, 5pm including sport

Radio Australia current affairs programme which focuses on island nations, bringing you morning and evening coverage of Pacific current affairs including interviews with political leaders, newsmakers, and the people who make the Pacific beat.

SOKA
EVADAHANA SOKA
ASOSIESEN
9 MAIL

NOKAUT GEMS
 Sarere 08 Oktoha, 2005

ESA 1
 10:00 Wasu Crabs vs Batisalem D2
 11:00 KT Mahnduz vs Batisalem meri
 12:00 AGM Roots vs Saphire D3
 1:00 Sulu vs Nalas Res
 2:00 Finka vs Siale D1

ESA 2
 10:00 Nen Konok vs Brothers D2
 11:00 Graveside vs Namagawi meri
 12:00 Nen Konokvs Simbai Utd D3
 1:00 Gee Neps vs Names Res
 2:00 Graveside vs Liwale D1

Sande Oktoha 09, 2005

ESA 1
 10:00 Country Roots vs AGM Roots D2
 11:00 Gaid Utd vs AGM Roots meri
 12:00 KT Manduz vs Outsiders D3
 1:00 BS Natives vs D-Rats Res
 14:00 D-Rats vs Gara Utd D1

ESA 2
 10:00 K-Imindos vs Raitopos D2
 11:00 Kilengs vs Country Roots meri
 12:00 K-Imindos vs Gala Konok D3
 1:00 Gaidi Utd vs Gala Konok Res
 2:00 Gee Neps vs Sulu D1

Note: 1st na 2nd placing tasol bai i gat sans gen long pilai sapos ol i lus. Match fee bilong fainels i go senisim nau i go K8.00 long olgeta tim.

NEW ERIMA SPOTS
 Sarere Oktoha 8, 2005

MENS-RAGBI TAS
 09:00 5 Mile Crushers vs NYC Fire Safe
 09:50 J/Kongos vs Mt Eagles
 10:40 FTM Slaves vs S/Sons
 11:30 5 Mile Animals vs M/Cowboys

12:20 21 Red Heads vs M/Dogs
 1:10 S/Stones vs H/Red Crocks
 2:00 IC Dragons vs C/Blues

Sande Oktoha 9, 2005

MENS-RAGBI RAS
 09:00 Hillstone vs Tax Base
 09:50 Flames vs Outcast
 10:40 T/T Casino vs 289 Top Street
 11:30 Golf Spiders vs BG Jets
 12:20 K. Roosters vs Neggie Dogs
 1:10 Loose Parlets vs G/Way Rabbitohs
 2:00 M/Rot Crocks vs Wild Cats
 2:50 Megusa Crushers vs Katimo
 3:40 J S Warriors vs BO Hunters

MERI - SOKA
 10:00 Kindino Sisters vs IC Dragons
 10:50 BO Hunters vs Nane Tigers
 11:40 289 Top Street vs JS Warriors
 12:30 BG Jets vs 21 Red Heads
 1:20 5 Mile Crushers vs Taxi Base
 2:10 NYC Fire Safe vs Megusa Crushers
 3:00 J/Kongos vs Mt Eagles
 3:50 38 Special vs FTM Slaves
 Bye: Sharp Rats

BASKETBOL
CBL

Hohola Courts
 Sande, 9 Oktoha
 nok-aut

Kot 1
 0930 U19B Saints vs Exodus
 1030 U19G Souths vs Exodus
 1130 WAR Saints vs Bwings
 1230 MAR Saints vs Souths
 1330 WA Jazz vs Exodus
 1430 MA Exodus vs Souths

Kot 2
 0930 U19B Tamaraws vs Jazz
 01030 U19G Bwing vs Chariots
 1130 WAR Titans vs Jazz
 1230 MAR Titans vs Tamaraws
 1330 WA Souths vs Chariot
 1430 MA Titans vs Saints

Bai: Chariots (U19B), Saints (U19G), Souths (WAR), Chariots (MAR), Saints (WA), Chariots (MA).

Momase soka tim bai pilai wantaim Jayapura

MOMASE rijinol soka asosiesen bai makim tim bihain long dispela mun long go pilai wantaim tim bilong West Papua long sampela taim long narapela mun.

Presiden bilong MRSA John Peka i tokaut long dispela tingting long taim em wantaim ol eksekutiv bilong em i wok long redi long holim rijinol sempionsip long Maprik, Is Sepik bihain long dispela mun.

Peka i tok dispela pilai namel long ol wantaim Jayapura tim em long strongim soka insait long rijon.

"Momase rijon i gat nem long soka na olsem long lukim spirit na standet bilong soka i go het mipela i laik kamapim sampela pilai namel long mipela yet na ol tim bilong Jayapura," Peka i tok.

Em i tok Momase soka i bikpela na strongpela rijinol soka asosiesen long kantri na olsem ol bai lukim planti ol strongpela pilai i kamap.

Wewak tim i holim taitol bihain long ol i winim sempionsip long Aitape las yia.

Long dispela yia 33 tim i bin tokaut long kamap long dispela sempionsip.

Ol tim olsem Lae, Lahi, Aliwong, Madang (MSA), Lumi, Bel (Madang), Wau/Bulolo na

Wewak bai kamapim ol tim bilong manmeri wantaim na ol tim olsem Wara Tanget, Bogia, Gaifar, KDSA, Guguruf, Amari, Mutzing, Finschafen, Wewak distrik, Angoram, Ambunti/Drekikir, Lae distrik, Aitape, Wutung na Waramo bai salim man tim tasol.

Long wankain taim Peka i tok asosiesen i redim K106,000 mani mak we em i basetim long holim dispela ol pilai.

Em i tok K15,000 bai go long wok bilong sekyuriti na K75,000 i go long wok bilong stretim ol pilai graun na arapela ol samting we K5,000 i go long baim ol tropi.

Na K30,000 em eksekutiv i redim long ol praismani.

Peka i tok tenk yu long Memba bilong Maprik Gabriel Kapris long givim gutpela sapot long mani na lukim olsem ol ples bilong pilai i redi bipo long ol pilai i stat.

Peka i tok ol bai bihainim ol lo bilong FIFA long holim dispela ol pilai.

Tasol em i to ol tim husat i laik kamap i mas baim K300 rejistresen fi i go long Benk akaun MRSF long ANZ Benk Lae Brens long akaun namba 1160756 bipo long Oktoha 18.



LUKAUTI! Dispela em FILBA pilai we i wanpela strongpela basketbol asosiesen long Pot Mosbi. Hia wanpela bikpela pilaia i no wari long ol birua pilaia i pasim rot bilong em long go. Em i laik go tasol.



PASIM EM: Pot Mosbi hoki i wok long go strong yet. I no long taim bai ol pilai i go insait long ol fainol



SEIF! Pot Mosbi sofbol i stat gen long 2005-2006 sisen. Hia ol meri i laik hatim sisen gen wantaim pilai bilong Kamara Kap.

Of foto: ANDREW MOLEY



EM HIA! Las wik PNG netbol i holim nesanel sempionsip we i lukim ol tim i kam long Kimbe, Alotau, Lae, Kerema, Sentrol na Pot Mosbi we ol i pilai wan wik olgeta stat long ol pilai bilong ol junia. Hia Pot Mosbi tim 1 meri i holim pas gut bal longwe long Sentrol pilaia. POM win 29-9.



HOLIM EM! Ol manki Pot Mosbi Grama Skul (long blu jesi) i laik mekimsave long Sogeri Praimeru Skul manki (long Parramatta jesi) long anda 16 skul ragbi long eliminesen fainol tupela wiken i go pinis. Pilai i strong na tupela i dro 0-0.



MIPELA RED! Ol Isten Haians provins manmeri i bin holim provinsol Gem bilong ol long tupela wiken i go pinis long redim tim bilong ol long kamap long Nesanel PNG Gem long Goroka long Novemba bihain long dispela yia. PNG Gem em ol manmeri i lukim olsem "Liklik Olimpik Gem."




I KAM! Pot Mosbi sofbol sisen i laik stat na olsem hia long kirapim skin ol i pilai long Kamara Kap bipo long go insait long raun pilai bilong ol stret. Sisen bai stat bihain tasol long mun Oktoba.



KLIA! Filipino Basketbol Asosiesen (FILBA) i wanpela strongpela basketbolasosiesen long Pot Mosbi. Hia traipela pilaia bilong wanpela tim i laik skoa na surukim olgeta arapela pilaia long Sir John Guise Indo Kompleks long las Sande.



BAI YU GO WE? Pot Mosbi hoki i wok long kamap strong na klostu ol tim bai kamap long ol fainol. Long hia tupela pilaia i mekim olgeta samting long abrusim narapela na win.



Cowboys son tumas

mamas

West Tigers
winim Not Kwoolan Cowboys
faino Telstra Stadium la Sande



BIKPELA AMAMAS: Swokin Magini long lephan na Dickson Wallen bilong PNG Kundu husat i stap long Wol Kap Tim.

GG welkamim PNG Kundu

... i kam long pes 32

"Yupela i pilaim Rasia na ol i givim yupela 0 tasol bihain yupela i kam bek na winim ol 22-9. Noken wari."

"I gat planti manmeri long PNG husat i save long pilaiam ragbi, ol gras rut. Yupela em ol Kumul bilong bihain taim."

"Narapela taim noken kisim brons i kam. Kisim gol i kam."

"Noken ken krai, yupela mas amamas," Sir Paulias i tok.

Long gutpela mak bilong pilai ol opisel i givim ol wanwan medol.

Na kosa Steve Malum husat i bipo Kumul pilaia na husat i wanpela PNG Ragbi Futbol Lig divelopmen opisa i tok olgeta samting em ol yangpela pilaia bilong mipela i gat. Tupela samting ol i mas i gat em pasin bilong takol na tromoi bal.

"Tekling teknik na pasing teknik em mipela i mas wok hat long em," Malum i tok taim em i bilip olsem PNG tim gat gutpela sans long kamapim ol gutpela pilai bihain taim.

"Sapos mipela i bin ronim skul boi ragbi lig long sampela foapela o faipela yia i go pinis mipela inap i winim kap," em i tok.

"Mipela i stat nau tasol. tekling

na pasim bal tasol em hevi bilong mipela."

"Skoa bilong mipela egensim Australia (52-22) em i no wari bilong mipela. Mipela i kamapim gutpela poin tasol i abrusim sampela gutpela sans."

"Maski ol birua tim i bikpela na i gat gutpela plen bilong pilai ol manki i yusim laik na amamas bilong ol long kamapim gutpela pilai."

Em i tok long kain pilai bilong ol nius long Rasia i bihainim gut pilai bilong ol.

Em i tok (kepten) Dickson Walen na Swokin Magini em tupela pilaia husat i stap long wol kap tim. Ol i no inap mekim wanpela samting long dispela tim tasol em soim olsem tupela pilaia bilong mipela i mekim gut long dispela bikpela tim wantaim ol pilaia bilong narapela kantri.

Malum i tok narapela tupela pilaia Welma Jerrick na James Segeyaro em ol bin makim ol tu long stap long dispela tim tasol i go baksait long top 20.

Tasol long dispela taim Walen husat i amamas long em na Magani i stap long wol kap tim i tok em i gat bilip olsem wantaim gutpela trening PNG Kumul tim bai winim Australia Kangaroo tim yet.

Liklik Isten Hailans Gret 5 meri winim 3000m

PORO Gahekau, 12, bilong Asaroka Isten Hailans provins husat i mekim Gret 5 i mekim PNG Etlitik Yunion presiden i kirap nogut taim em i winim 3000m resis long anda 16 long nesanel etletik sempionsip long Lae las wiken.

Presiden Tony Green husat i anamas tru long Gahekau i tok em i gat bikpela bilip olsem dispela liklik meri i no longtaim bai kamap PNG sempion long ol longpela resis. Em i tok Gahekau i klostu i kamapim mak em ol bikpela meri i bin kamapim long sinia divison. Em i kisim 11 minit 11 seken long Gahekau long winim dispela resis.

Em i winim tu 1500m resis long taim 5 minit 15 seken na dispela i wankain long ol taim em ol bikpela meri i bin resis long em i no long taim i go pinis.

Wantaim em tupela liklik meri Simbu Agatha Bir na Joan Kamb long midol na long distens iven.

Na long ol tim Pot Mosbi tim i mekim gut.

Tupela taim Olimpian Mowen Boino i go pas long Pot Mosbi etletik tim.

Dispela em Green i tok Pot Mosbi tim i bin redi gut tru bipo long ol kamap long ol resis.

Boino i go pas long winim fainol bilong 110m na 400m hedol.

Bihainim em 17-yia manki

Andrew Doonar husat i kamap long namba foa na tu ples long 100m na 200m sprin.

Long em i laik stap long PNG tim na kamap long 2006 Melbon Komenwel Gem Doonar i lusim resis bilong anda 18 na kamap long 4 X 100m rilei resis.

Narapela yangpela manki Fabian Niulai i kamapim gutpela mak taim em i ron aninit long 48.6 long winim 400m fainol resis. Wally Kirika husat i makim Isten Hailans i kamapim ol gutpela mak tu taim em i ron long 100m sprin long kamap long 10.8 seken.

Na Sammy Sasama i soim tu gutpela mak taim em ron long 200m na 400m resis we Green i tok maskim em i no kisim inap taim long tren.

Junia etlit Nadia Bais na Raphaela Baki husat em Naomi Polum i kosa bilong ol long Pot Mosbi i kamapim tu ol gutpela mak bilong ron.

Baki i winim 100m sprin long open divison we Green i tok dispela em i bikpela senis long pesinol bes taim bilong em. Em i kamap long 12.5 seken long 100m sprin. Em i winim tu 200m resis.

Long anda 18 divison Nadia Bais winim tu 100m resis na 200m resis we em i kamapim pesinol bes taim long 13.2 seken na 27.8 seken. Long wankain

taim Patricia Harricknen i winim tupela resis long anda 16 divison.

Green i tok em i amamas long lukim planti ol meri i kamap long resis long ol sprin na hedol na i tok dispela bai helpim PNGAU long makim gutpela skwat bilong 2007 Samoa Saut Pasifik Gem.

Na long fil iven Simon Benari kamapim gen ol gutpela mak bilong pilai.

Benari i resis long eit iven Oktaton we dispela seken-yia Yunivesiti bilong Goroka em i skoaim 5200 poin.

Dispela Green i tok em mak we i winim mak inap long winim gol medol long las Julai mini Saut Pasifik Gem long Palau.

Green i tok long tupela wik i go pinis Benari i mekim ol opisel bilong Osenia Etlitik Yunion long Australia i amamas tru long ol ol gutpela resis bilong em.

Long pilai bilong ol meri Betty Burua i kamapim tu gutpela mak bilong resis we em i winim long jam na kamap namba tu long 200m resis.

Dispela Gret 11 sumatin long Goroka Sekenderi Skul husat i stap aninit long PNGAU sponasip em Yunion i askim em long redim em yet long heptation long kamap long 2007 Samoa Saut Pasifik Gem.

Komenwel Gem Kwin rilie tos go long Madang tu

MADANG i laspela ples long kisim Komenwel Kwin Tos Rilei we bai kam long kantri long dispela Sande.

Dispela em bihain long ol oganaisa i tokaut olsem Pot Mosbi, Lae, Goroka na Rabaul em ol ples tasol bai kisim Tos. Tasol long dispela wik ol oganaisa i senis na tok Tos bai go tu long Madang.

Gavana Jenerol Sir Paulias Matane bai welkamim dispela Tos wantaim foapela man-Komenwel Gem Federesen opisel John Tierney, 2006 Melbon Gem opisel Jessie Grant, Vikoria polis opisa Stephen Ashley na potoman William Salter.

Wantaim Gavana Jenerol long bungim dispela ol lain em Minista bilong Spot Dem Carol Kidu, siaman bilong NCDC Sir

Mekere Morauta na presiden bilong PNG Komenwel Gem asosiesen Sir Henry ToRobert.

PNG i namba wan kantri long Osenia rijon kisim dispela Tos we em i 58 memba long 71 Komenwel kantri we dispela Tos i wokabaut long en.

Dispela em bihain Sir Paulias Matane i statim rilie long Independens Hill long Mandé 10 Oktoba we ol bai wokabaut long sampela 21 kilomita bipo ol i go long Sir Hubert Murray Stadium.

Bihain long Independens Hill GG bai givim Tos long Spika bilong Palamen Jeffery Nape husat i makim Lejisiesen bipo em i givim long Sif Jastis Sir Murray Kapi husat i makim Judisari o Kot.

Long tokaut long wokabaut bilong Tos

PNG Spot Federesen seketeri jenerol Sir John Dawanincura i askim tu PNG Red Cross, ol sios na sarifi grup long makim mausman bilong ol long karim Tos.

Long dispela taim federesen i kisim pinis nem bilong 80 manmeri husat i laik karim Tos.

Sir John i tok ol manmeri husat i kisim tok orait pinis long kisim Tos em federesen i askim ol long kamap long Sir John Guise Indo Kompleks long tede (Fonde 6 Oktoba) long ol i mas kisim ol toktok bilong samting ol bai mekim long dispela de.

Nem bilong ol lain husat i stap long Pot Mosbi, Goroka, Lae na Rabaul em nem bilong ol i kamap Pos Kuria tede wantaim toksave bilong ron bilong polis na ol hap we rot blok bai kamap.

PNG Swimming Inc. makim Komenwel Gem trening skwat

BIHAIN long las wiken Marsh nesanel long kos sempionsip long Pot Mosbi PNG Swimming i makim sikspela swima long stap long trening skwat bilong 2006 Melbon Komenwel Gem.

PNG Swimming Inc presiden Elizabeth Wells i tok dispela ol lain em Ryan Pini (23), Judith Meauri (13), Nicole Ellsworth (14), Dorcas Emmanuel (17), Krystle Babao (18) na Anna-

Liza Mopio-Jane (18).

Wells i tok long stap long dispela skwat na makim PNG ol swima i mas bilong PNG (PNG sitisen) na i holim paspot dispela PNG. Komenwel Gem bai stat long Mas 15 i go inap long 26, 2006. Bihain long dispela Ryan Pini na Anna-Liza Mopio-Jane bai swim long Kwinslen Open sempionsip long Jenuari 30 i go inap long Februari 4, 2006. Liz i tok dispela em bihain

long askim i bin kam long Kwinslen Swimming Inc sif eksekutiv opisa Kevin Hasemann long sapos PNG inap kamap long dispela ol sempionsip tu.

Liz i tok dispela sempionsip em i save kamapim ol gutpela swima na i bilip olsem kamap bilong Pini na Mopio-Jane bai helpim tupela gut.

Long dispela taim tu Liz i tok PNG Swimming Inc i askim nau

long ol manmeri husat i laik givim nem bilong kamap kosa o menesa bilong Komenwel Gem.

Na long givim tok orait Liz i tok PNG Spot Federesen wantaim Nesanel Olimpik Komiti bai skelim pastaim sapos dispela ol manmeri inap long mekim ol wok.

Long kisim dispela wok manmeri i mas gat pas gut long wok bilong spot long dispela taim na i gat save long ol lo bilong spot na olsem i

nogat rekot nogut wantam ol polis.

Long ol kosa ol i mas kisim luksave bilong PNGSF na NOC long i gat level 2 bilong kos. Sapos i nogat level 2 orait tupela opis bai lukluk long kisim manmeri long husat i gat level 1 kos setifiket.

Toksave i mas go long telepon/feks namba 325 8573/325 6500 o imel i go long wells@daltron.com.pg.

Kingsley kamap petron bilong kikkboksing klab

MADANG memba bilong paliamen Alois Kingsley i kamap petron bilong Madang kikkboksing klab bihain long PNG Kikkboksing Asosiesen i statim wanpela nupela klab long Madang.

Long taim bilong statim dispela klab Kingsley i tok ol manmeri long kantri long dispela taim i mas gat kain skul we i ken helpim ol long skelim gut tingting na long stap gut long komyuniti na em i moa gutpela taim kikkboksing i go long Madang na opim klab.


Em i tok taim ol manki i nogat samting long mekim na taim ol i no kism gutpela skul ol i save pas long kainkain pasin we planti bilong ol em ol pasin nogut. Ol pasin nogut olsem kism spak brus, dring hom bru na dring bia i save mekim ol man i go longlong na i save go long bagarapim ol narapela man na samting bilong ol.

Tasol sapos ol i ken go na stap aninit long ol gutpela skul dispela kain pasin bai i no inap kamap.

Em i amamas long kikkboksing long wanem PNG kikkboksing sempion Stanley Nandex i kamapim bikpela nem bilong kantri long ol pait bilong em long wol na long winim amata wol taitol.

Long dispela taim Kingsley i askim PNG Kikkboksing long go insait tu long ol ples long provins na kamapim ol klab long helpim ol narapela manmeri.

Em i tok amamas tu long faivpela Madang kikkboksing paitman na meri



BRUKIM EM: Em i tingting bilong PNG kikkboksing sempions Stanley Nandex long lukim planti manmeri i stap insait long kikkboksing at. Hia dispela man ol i kolim "hetanta" i mekim wanpela kik nogut bilong em long wanpela pait long ovasis.

kamap sempion long divison bilong ol long las mun nesanel sempionsip long Lae. "Long amamas long faivpela kikkboksing mi givim K10,000 long ol long makim Madang na PNG," em tok taim em i givim mani long ol long go pait long wol kik-

boksing sempionsip long Kenada long Novemba bihain long dispela yia. Nandex husat i gat bikpela nem long dispela pilai i laik lukim tu olsem planti manmeri long kantri i mas stap long dispela pilai.

PNG netbol bai lukim loya pastaim long mekim senis long netbol lo

LAS wiken PNG netbol i tok orait long lukim loya bilong ol bipo long ol i mekim sampela senis long lo bilong ol.

PNGNF presiden Emily Taule i mekim dispela toktok bihain long wanpela AGM we eksekutiv bilong em i holim long las Fonde.

"Mipela i laik mekim ol senis we i ken kism netbol i go long olgeta ples long kantri na long wankain taim lukim ol meri i kamap long pilaim netbol," Taule i tok.

Em i tok long mekim ol senis dispela bai kism sampela taim pastaim long wanem loya bilong bai mas lukim pastaim.

Em i tok long AGM ol i makim tu Madang long holim 2006 nesanel sempionsip.

Madang i no bin kamap long las wik nesanel sempionsip long hevi bilong mani tasol bikos ol i wanpela asosiesen tasol husat i givim nem long holim ol pilai dispela i lukim federesen i givim tok orait tasol long ol long holim ol pilai.

"Wewak i mas holim ol pilai bilong dispela yia tasol long ol i no inap long holim ol na olsem federesen i

bin askim Madang long holim tasol gen Madang i no laik long wanem em i las minit askim na olsem federesen i askim Lae."

Tasol Taule i tok Lae husat i save tok kros long federesen oltaim i save makim ol pilai bilong Pot Mosbi i no laik long holim ol pilai na olsem Pot Mosbi i mas go het long holim ol sempionsip bilong dispela yia.

Em i tok planti ol asosiesen i kamap bikpela na strong long netbol pilai na olsem em i bilip long sampela yia bihain liklik ol arapela senta bai i gat inap pawa long daunim ol tim bilong Pot Mosbi.

"Mak bilong pilaim netbol i kamap strong moa yet. Dispela i lukim Sentrol i winim olgeta junia taitol. Na Alotau i winim B Gret divison."

"Ol narapela sinia divison olsem divison wan na Masta em Pot Mosbi i winim," em i tok.

Long masta em ol Pot Mosbi yet i win. Tasol pastaim long wik ol junia i divison olsem anda 13, 15, 17 na 21 i bin pilai we dispela i lukim Sentrol i winim olgeta pilai. Klostu em bai kamap olsem Pot Mosbi.

Iakosi/Pinampio winim Pot Mosbi hap maraton

LAS wik Sande Pot Mosbi Rot Rana i bin kamapim Pot Mosbi Pos Opis- Ples Balus Hap Maraton.

Dispela resis em i namba tu hap maraton insait long kalenda bilong Pot Mosbi Rot Rana, narapela i bin Ela Bis- Baruni Hap maraton long mun Mei.

Las wik Sande i bin gat 31 rana husat i bin kamap long ron long dispela hap maraton resis.

Resis i bin stat long 5 kilok long tudak yet na ol rana i hatwok long painim gutpela rot bilong ron we ol i go antap long Friwe i go olgeta long ples balus. Long ples balus ol rana i tanim na kam bek long taun.

Planti bikpela maunten long Friwe na sampela spakman i bin mekim hatwok tru long ol rana. Long dispela taim i nogat trabel i kamap.

Bikos ol i bin stat long nait yet em i bin kol liklik tasol sampela rana i painim hatwok tru long taim san i kamap. Bikpela tenk yu tru i go long Simon, Roger na Rob husat i givim wara long ol rana.

Ol rana bin stap pas i bin mekim gutpela spit tru. Long ples balus Milton Iakosi na Simon Pinampio i bin ron tupela wantaim. Ol i bin mekim spit tru long kam bek long Friwe. Taim tupela i kamap long Friwe Iakosi i bin spit moa yet na em i winim resis long taim 1:23.03.

Dispela taim em wan minit tasol bihain long resis rekot. Pinampio i bin kamap namba tu ples, em foa (4) minit bihain long Iakosi.

I luk olsem Iakosi i kamap

namba wan rot rana long PNG nau. Nogat wanpela rot rana inap long winim em long POM rot rana resis.

I gat 19 rana i bin pinis resis aninit long 2 aua na soim gutpela trening na strong bilong ol.

Deahne Turnbull em i namba wan meri husat i pinisim dispela hap maraton. Bipo nogat wanpela meri i pinisim dispela hap resis. Turnbull i kamap long taim 1 aua na i winim ol sampela strongpela man rana. Taim bilong em 1:52.55 na em i winim ol sampela strongpela man.

I luk olsem sampela man i no inap long winim dispela meri nau.

Sampela rana husat i lapun liklik i bin mekim gutpela senis tu. Paul Crouch-Chivers em i kamap long taim 2:09.46 we em i pasim Kevin McCarthy husat i kamap long taim 2:09.59 we em i kamap long mak bilong pinisim resis long Pos Opis.

David Cannings em ron na kamap long taim 2:14.19 we em ran isi isi olsem i no longpela taim we em i bin resis long Sidni maraton.

Ila Geno em ran na kamap long taim 2:17.46 we i mas amamas tru long gutpela taim bilong em.

Paulus Opus husat i kamap long taim 2:13.48 na Martin Maire husat i kamap long taim i bin painim resis hat wok tru long taim san i kamap.

Bikpela tok tenk yu tru i go long lain husat i givim helpim long ol rana i go i kam long resis na bikpela tok tenk yu long Gir husat i makim taim bilong ol rana.

Hap hap nius

POM Skul soka holim kosing klinik

JOHN Mogi bilong skul soka bai holim sampela kosing klinik bilong anda 13, 15 na 17 long tem 4 long Sir John Guise Stedum stat long dispela Sarere. Mogi i tok ol skul i mas salim 15-pela gutpela pilai bilong ol long tripela dispela ol divison. Na ol manki i mas i gat 10-pela krismas i go inap long 16. Ol pilai husat ol i makim long go long klinik i mas paim K5 registresen fi o baim tasol K1 long wanpela klas. Ol klas bai kamap long indo Kompleks na bai stat long 8:30 moning. Wanpela aua tasol. Long Trinde Okteba 12 em klas bilong anda 15. Em olsem ol lain husat i stap aninit long 13, 14 na 15. Na ol klas bai stat long 4:30 avinun i go inap long 5:30 avinun. Long Fraide Okteba 14 bai gat klas bilong anda 17 we ol manki krismas bilong ol i stap aninit long 15, 16 na 17. Long Sarere Okteba 15 bai gat klas bilong anda 13 we bai kism ol manki long anda 10, 11 na 12. Ol klas bai stat long 8:30 moning i go inap long 9:30 moning. Ol papama i mas stap wantaim pikinini bilong ol long dispela taim. Long save moa ringim Mogi long telepon namba 326 0723 o long mobail namba 687 6293.

Chariots kamap CBL maina primia

CHARIOTS basketbol tim i maina primia bilong Kapitol Basketbol pilai long Pot Mosbi. Dispela em bihain long maski ol i go daun long Souths 39-55 long stat bilong eliminesen fainol. Chariots i gat sampela ol gutpela pilai olsem Morris Asiba husat i bin wok long pilai gut tasol long wiken i painim hat taim ol Souths i holim nek bilong ol na daunim ol i go daun. Ol Souths pilai olsem Baxter Travertz, Dickson Dobunada, Simon Dixie na Raymond Elai. Tasol i gat as bilong Souths long pait strong long dispela pilai long wanem dispela i helpim ol long stap long top faiv ples long go insait long ol fainol. Long ol arapela pilai Saints winim Titans 49-28 tasol dispela win bilong ol i no inap long helpim ol long go insait long ol fainol. Long fainol bilong dispela wiken Chariots bai sambai tasol i stap we Exodus bai kism Souths na Titans bai hukim Tamaraws.

MRDC givim PNG snuka K20,000

LONG redim tim bilong ol MRDC i givim K20,000 long PNG tim long kamap na pilai long namba wan Fiji veses PNG snuka pilai long dispela wiken stat long tumora. Dispela pilai bai kamap long Fiji. Long taim yet tripela PNG pilai- Howard Lahari, Gus Kraus na Barry Tan i stap pinis long Fiji long bungim ol Fiji pilai tasol PNG Billiad na Snuka Asosiesen i tok wantaim kain helpim i kam long MRDC dispela em i bikpela helpim tru. Asosiesen i tok bikos i nogat helpim i kam long sampela bikpela grup tripela man ya i mas kism mani long poket bilong ol yet long kamap long ol pilai. Ol narapela pilai olsem Rogers Ng, Thomas Thien, Yiannis Nicolaou, Arua Simoi, Barry Tan, Steve Harrison na Phil Arcadiou bai lusim sua tede na go long Brisbane, Australia na bihain go long Fiji long bungim ol tripela wan pilai bilong ol. PNG i bin kamap long ol bikpela pilai olsem wol pilai pinis.

**LAE
BISCUIT CO.**



SWANTOK SPOTS

**LAE
BISCUIT CO.**



Ol top manki

Paul Zuvani i raitim

EM i bikpela samting PNG Kundu Yut tim i kamap namba tri long Wol Yut kap pilai, Papua Niugini Gavana Jenerol Sir Paulias Matane i tok taim em i welkamim ol Kundu long Jackson Intenesene! Eapot aste.

Na GG i laikim ol i mas kisim kap i kam long kantri long 2008 Wol Kap pilai.

"Yu kamap namba tri long wol, dispela em i bikpela samting," Sir Paulias i tok. "Taim yupela i lusim kantri ating yupela i no bin save gut long narapela narapela tasol nau yu mas save gut long yupela yet."

"Yupela i pilai wantaim Australia na yupela i mekim gut. Long wanpela hap skoa bilong yupela i klostu klostu. Dispela i em gutpela mak tru."

"2008 em i Wol Kap pilai. Long dispela taim mi laik yupela i kisim kap i kam long PNG."


Long taim ol Kundu i kam insait long dua bilong ples balus Gavana Jenerol i welkamim ol olsem ol bikman.

"Welkam ol iro. Tenk yu tru long putim PNG long (wol) mep."

"Maski yupela i stap long-we long kol ples na mipela i stap long hot ples hia mipela i save gut tru long wanem samting yupela i mekim long hap."

"Yupela i pilaim Skotlen na givim ol 64-0, mipela i save. Yupela i pilaim Barbarians na winim ol 44-8, mipela i save."

I go moa long Pes 30...



RAIT OLGETA: Papua Niugini Gavana Jenerol Sir Paulias Matane i welkamim PNG Kundu long Jackson Intenesene! Eapot long aste long ol mekim gut long kamap namba tri long wol kap pilai long Rasia.

Foto: NICKY BERNARD



Lukim moa NRL gren fainol poto:
Pes 29


SINGER INDUSTRIAL SEWING MACHINES

AT HOME WORLDWIDE

Prices from
as low
as K 1,995!


Istap long Soft Touch
First Floor, Brian Bell Plaza,
Boroko, NCD, PNG
Ph: 325 5411 Fax: 325 0167
Brian Bell
Shop with a friend

SINGLE NEEDLE
LOCKSTITCH MACHINE




Model 2491 D300A
Code: 112128
Complete with
table stand
& motor

WALKING FOOT MACHINE
SINGLE NEEDLE HEAVY DUTY
LOCKSTITCH MACHINE



Model 4411A566
Code: 171797
Lockstitch seaming medium
and heavy weight materials,
heavy clothing, canvas,
upholstery, automobile
trim etc...
Unison feed; large book
Complete with table stand & motor

OVERLOCKER



Model 1842U 065-5
Code: 116669
5 thread overlocker
with table stand
& motor

The publisher of the newspaper is Justin Hansu Kili, MBE of Section 58, Allotment 3, Office 2, Waigani Drive